



明齋先生集 二十

墓碣銘

卷二十一

~ 16  
2376  
21





和  
2376  
26-21

明齋先生遺稿卷之三十九

明齋

墓碣銘

戶曹佐郎梁公墓碣銘 庚辰

公諱棟字君實姓梁氏梁氏始出濟州爲良姓與高夫二姓分長其地新羅時改良爲梁賜籍于南原遂爲南原人歷高麗入我朝世有顯官有諱川至成均生員有隱德作家訓以教子孫卽公之五代祖也高祖諱灌同知成宗賜御札褒其清白曾祖諱應鯤屢徵不就官至僉正祖諱喜吏曹參判奉使京師卒于玉河館天子賜弔祭後以奉使盡瘁贈吏



曹判書考諱弘澍義禁府都事嘗疏斥仁弘數其惡甚悉後以壬辰奮義赴難 贈吏曹參議妣延安李氏縣監師閔女 贈淑夫人公以 萬曆庚寅正月乙丑生六歲伯氏槐事牛溪先生自坡山歸口授孝經一章公輒能記誦十三以父命就學于沙溪金先生庚戌丁外憂執喪盡誠禮壬子春為誣獄所引竄西塞即光海昏朝也戊午量移泗川明季蒙宥歸鄉癸亥 仁祖即位自戊申以來凡係冤獄一皆伸雪李延平貴金昇平塗奏公為 孝陵參奉丙寅丁內艱服闋補翊衛司洗馬遷義禁府都事嘗奉 命往

濟州具牲醴祀上祖於漢拏山及還 命拿平安兵使柳琳于安州琳方聚軍閱武時去适難不遠眾頗危之公不顧以單騎入陣收之於是危之者咸服歷司宰監軍資監尚衣院主簿出為龍仁縣令未幾罷歸復歷司贍寺宗簿寺主簿軍資監判官掌樂院主簿戊寅夏除禮安縣監三季棄歸甲申拜全州判官翊衛司司禦皆不就明季拜戶曹佐郎九月又出宜寧縣監既至興學養士繕兵薄賦治聞朝廷居三季賜表裏者三虎皮弓馬者各一 仁祖賓天公自以受 恩未報為痛哭泣哀慕盡方喪之節是冬為繡



衣所罷觀察統制節度諸使交章訟其寃 孝宗命  
再赴官公時已寢疾力辭不就明季二月三日卒于  
里第壽六十一計聞公卿大夫莫不嗟惜葬于咸陽  
郡北冶洞參判公墓下甲戌改葬于同塋向卯之原  
公娶信川康氏兵曹參判昱女先公十二季卒於己  
卯六月壽四十五再娶居昌劉氏司宰監僉正光道  
女後公一季卒於辛卯五月壽三十四皆配公德無  
違康氏出者一男七女劉氏出者二男一女男長用  
濟次道濟俱通德郎季處濟女長適將仕郎朴後文  
次宣教郎權哲次士人申楠次翊衛崔徽之次李社

遠洪字燁曹始遂丁載和皆士人側室子慎濟用濟  
男錫弼道濟男錫命側出錫輔處濟男錫吉二女鄭  
希僑權尚元側出錫孝錫老慎濟男錫虎朴後文三  
男三女曰再蔓進士以孝旌門曰再茂曰再華通政  
縣監女府使任弘亮洪敘極金九相權哲二男曰尚  
弘尚信申楠男曰景潤崔徽之二男一女曰是翁以  
薦爲童蒙教官曰啓翁司諫院正言女金哲洪字燁  
三男三女曰墳均堉女李奎祥蔡悌胤安瑞增李曹  
丁氏皆早死未育內外孫曾五十餘人公幼被父師  
之教孝友有自來矣加以才識出於等夷亦不爲斬



截之行惟義是比當昏朝時跼伏畎畝未嘗一言及於世及遇明時亦棘棘不阿居官律已務自謹慎去官而人民思之身歿而親舊無怨議自號順受又曰任天處濟錄公事行為狀請銘於潘南朴公世采未及成而朴公捐世處濟以其伯父受學於牛溪而拯為牛溪之彌甥也以世誼來屬於拯拯後生也未及識公而與處濟及崔君是翁兄弟善謹最其狀而為之銘曰

士難有才才難遇時 既有既遇功業可期 而又  
迍邐若或尼之 嗟哉梁公奈數之奇 數則奇矣

素履無變 曰順曰任其志可見 我筆無文何以

闡幽 子姓綿綿尚徵餘麻

昌平縣令沈公墓碣銘

公諱櫟字茂卿姓沈氏青城伯德符之十一世孫也  
有諱光彥左參贊號鈍庵生諱鎬 贈大司憲寔公  
之高祖也曾祖諱宗敏郡守 贈判書金文正公尚  
憲誌其墓祖諱俠郡守考諱之澤少志學早世妣寧  
越嚴氏郡守諱悅女也公以 天啓壬戌五月十八  
日生自幼孝謹季十二三連丁內外艱持制如成人  
適華使入城家傍路諸少要與共觀自以服衰伏不



應見者稱之服闋值丙子之難隨諸父流離鄉曲就從祖恥軒公某受學不輟既娶還京第先是恥軒公出守權奉廟主至是還奉家廟修復舊業起自孤苦能有樹立人以為難公既夙遭喪亂稍長又纏家務常以未能肆力於學業自歎屢中解額而卒無成歲丁未筮仕為四山監役奉公廉恪所管地為譁舌市井輩北邙犯禁居多例以關節苞苴圖免公一斷以法請賂俱絕京兆嘗以事欲覈冢數俾公詳摘公即令各植標冢傍馳審拔取日未暮還報上官歎其敏庚戌陞軍資監主簿當收稅分料例有剩餘以私用

公輒皆散諸下輩莫不感服辛亥大饑設賑廳公以選為郎時加以癘疫死者相屬公略無難色竭誠救濟活民最多壬子授掌苑署別提遷掌隸院司評以親嫌遞癸丑復引儀兼漢城府參軍府吏私相戒曰是向監四山剛明者也其秋拜昌平縣令以為民社所寄尤當盡心夙宵一念惟七事是務修諸祀壇時至必躬親致虔當旱禱雨屏蓋不張得雨則不避沾濕民感其誠每月躬謁聖廟點檢器用有毀必修邑舊有書堂久廢即令繕葺且求能文者以主之村秀多興起有貧不能嫁女者招勗其家長而助其需每



歲時捐俸備饌物存問境內老人又嘗設宴以享遠  
近來觀而歌詠之凡有違官令者雖豪右未嘗饒假  
民皆畏服尤慎於獄裁決無滯湖人有訟者方伯多  
屬于公負者不能怨當簽丁有一氓扶杖託蹇疾自  
訴公知其詐命取其屨詰之氓即伏縣獲盜數人公  
不自治悉送討捕使蓋不欲以捕賊受功也丁巳以  
公格遞歸自官雇馬民不知送故之費人曰官帑充  
盈胡不報使曰節用致羨欲補民徭耳有餘則畱爲  
後人用可矣何可效人希賞及歸邑人如失親戚戊  
午除司宰監主簿黽勉就列適有北使公差都監館

伴吳始壽有所誤啓歸咎於公見遞癸亥秋補懷德  
縣監又以公格不赴丙寅二月十七日以痼疾終于  
京第享年六十有五公內行甚修日必拜廟祭必沐  
浴致潔未嘗以俗忌拘廢時新之物雖翔貴必登時  
備薦墓祀之需必監封領往躬視熟設朔望所用必  
計日預具未嘗臨時窘束三世墓道碑誌俱闕竭力  
營辦猶以未及豎表臨終遺囑甚悉常以早喪父母  
不得致誠於終事爲痛喪配之日務從儉約戒於身  
後亦然其事諸父也同居侍奉嘗選癘不離側嘗久  
疾跼危步尋醫藥夜不解帶遭其喪未葬不去喪次



素食踰禮有一妹其嫁遣也服飾餼具無有不辦舅家感歎以爲雖親在何加焉旣寡無子每悲憐之其赴縣也率去以養與弟府使公日輒相會聯案共枕又借以畿莊俾贍其用乙丑府使公謫廣陵公時寢疾曰病中睽離何以慰懷卽昇往同處數月其篤於同氣如此遇人困急隨力救濟有貸無償亦置不問親舊有罌雖尺布斗粟必有賻或無以斂爲解新襦而與之平居早起盥櫛非有疾則不設惰容服食不求甘美雖上服不嫌補綴居處不求安樂病時亦却屏簇器用樸陋不喜浮奢未嘗藏蓄珍奇顧嘗嗜書

籍家雖貧有鬻必買教子孫勿交雜客勿設雜戲惟專心於簡編平生行己不苟雖微細之物未嘗有求於人末年居閒幾十載無意求仕雖相親者若登顯則不踵其門於事每自稱足曰官歷內外壽比祖先觀人之奔走衣食多行苟賤吾無是而能免飢寒此皆吾足也可又營求分外耶自從仕凡官物雖微且例受者輒感歎曰罔非 國恩其何以報彼貪饕負國者雖滅身不足恤也在縣朔望望闕之禮未嘗一廢連遭 國恤露處地上以至成服哭必盡哀當仁敬王后喪公病方劇強起促駕扶人就班見者咸



歎其忠悃性少許可接人能辨其妍媸見人非義不面折之則默而去之知公者以爲某於人如見肺肝真可畏也最惡浮屠及巫覡在縣痛禁神祀獨孫邁危疾家人欲事祈禳不許及公疾篤妹欲潛禱公知之切責曰壽夭有限何可作怪其達識又如此此皆公之質行也公娶驪興閔氏 贈參判震亮之女德容並備閫職咸修公之奉先備禮居家以治友愛加厚內助爲多生於丙寅卒於丙申生一男曰廷熙繼娶延安金氏士人敏成之女亦有婦德宗黨稱之生於己卯卒於丁未公初葬于廣州己巳十月遷窆于

利川屯知山後谷里負乾向巽之原二淑人並祔焉廷熙娶僉知李憲女生一男曰竣竣娶副提學尹搢女生男曰奎鎮星鎮昔亾友宋子文公之姨弟也拯初從子文識公欽其悃悞真慙時吾先子方裒牛溪續集公之曾祖郡守公即牛溪門人也從公得牛溪手帖甚多公之謹守舊家文獻亦可徵也公歿後七季胤子來託墓文以病陋辭不獲謹叙而銘之銘曰我觀於人天賦爲最 加以濡染其用亦大 嗟惟沈公信美其質 矧爾淵源德友攸述 于家于官良心藹然 雖未顯揚其行可傳 有子有學有孫



有才 我徵餘慶用勗方來

司憲府持平韓公墓碣銘

公諱必明字晦而清州韓氏也始祖蘭為高麗統合  
三韓功臣世襲冠冕麗末有諱脩右文大提學諡文  
敬是生諱尚敬入我朝為開國功臣領議政諡文  
簡再世而至諱繼禧翊戴佐理功臣右贊成諡文靖  
公之六代祖也高祖諱胤昌禮曹參判曾祖諱克恭  
司圃別提 贈左承旨祖諱天賚成均生員 贈吏  
曹參判考諱孝仲同知中樞 贈吏曹判書金文正  
尚憲銘其墓妣貞夫人李氏 世宗大王之後監察

彥亨之女也公以 萬曆丁酉三月五日生而清  
秀俊雅既長文行俱茂人以遠器期之遊任踈庵叔  
英之門儷藻亦為一時儕流所稱 仁祖甲子中生  
員入泮務持清議戊辰丁外憂廬墓三季不釋衰麻  
毀瘠成疾幾不能保服闋授義禁府都事旋除翊衛  
司洗馬癸酉陞衛率乙亥移工曹佐郎坐微事罷丙  
子冬虜兵入國 大駕去邠時母夫人將赴仲子清  
風郡任所避兵公謂老親無恙今有依歸而 君父  
有急誠臣死之日也身雖無職義不可去遂隨難於  
南漢難已拜掌隸院司評出為昌寧縣監時搶攘之



明齋遺稿卷三十一  
餘官事板蕩公約已蘇殘治績日彰辛巳母夫人自清風歸寓于驪江公即棄官歸侍邑民立石頌德十月擢庭試壬午自禮曹佐郎連拜司諫院正言司憲府持平至癸未二年之間屢入兩司兼春秋館記事官論議公直不避忌諱嘗有亞銓者恣意循私人皆側目而不敢言公劾罷之咸服其風采甲申丁內憂執喪愈固竟以是季五月十八日卒于驪州墓廬壽僅四十八公氣質純明言語簡默而晰於是非志氣高亢而事務寬裕孝父母友兄弟宗黨稱其敦睦朋友推其信義平居恬淡妻孥不免寒餓莅官清簡未

嘗以一物自隨長身美鬚儀度凝重自爲儒生時已有聲名及登第益負重望人數一時名類指必先屈不幸不勝喪以没人莫不痛惜焉配驪興閔氏承旨護女也後配全州李氏縣監鳳龍女也咸有婦德善事尊章奉君子無違皆先公歿有二女一子女長適縣監趙宗冕閔氏出也次適郡守尹埈子曰如川李氏出也側室一子如范一女爲出身李去病妻如川娶滄江趙公涑女生四男三女男曰泰箕佑箕範箕允箕婿曰鄭儀周李萬始朴泰胄生員趙有四子二女曰儀漢奉事儀廷儀獻儀華生員李後鼎尹毅駿



尹有一子六女曰世鐸李聖錫李思遠進士李徵海  
李箕獻閔仲基李蓋泰箕三男二女男曰鳴朝餘幼  
佑箕二男一女範箕一男一女允箕一男並幼內外  
孫曾四十餘人公初葬于驪州興谷二配皆各窆壬  
申改葬于興谷已向之原二配並附即判書公墓左  
麓也如川季甫十三俱喪怙恃夙嬰疾家居友悌守  
素養拙親知有欲薦引者而不願也實爲承家之賢  
子而又不幸無命而逝知之者重爲之哀傷也公歿  
幾五十季墓道尚無顯刻蓋欲俟合窆而未及也泰  
箕等請狀公行於公之從子處士禮山公如海佑箕

奉其狀來請銘於拯拯未及拜公而禮山公與吾先  
人交誼不泛佑箕又與相從操履謹飭情義不得以  
辭謹最其狀而係以銘顧此衰陋不文不足以不朽  
公是可媿己銘曰

有忠有孝有文有質 既已蜚英輿望方蔚 胡克  
于季展布不卒 有子克賢亦復沉淪 理必報善  
氣有屈伸 劉之于石用勗後人

海州牧使閔公墓碣銘

拯昔在市南俞先生門下獲聞驪興閔公甚熟其後  
遂獲拜於七山蒙款又甚厚至今不能忘公歿後十



季公之胤子伯基委訪窮谷託公墓銘以衰陋不文  
辭不獲謹按閔氏顯自高麗代有聞人有諱世榮入  
本朝官至工曹典書卽公之九代祖也高祖諱叢典  
籤曾祖諱致中 贈左承旨祖諱護承旨 贈左贊  
成考諱應慶府使妣南平文氏縣監夢轅之女公諱  
燾字太初以 萬曆丁未生性夷曠有器局在弱冠  
人以公輔期之己卯登上庠甲申筮仕由社稷署慶  
基殿參奉司饗院奉事有都監勞陞內膳寺主簿累  
遷義禁府都事戶曹佐郎正郎平市署令癸巳除沔  
川郡守三年而歸邑人立碑追思丁酉遭外憂己亥

除咸興判官未一歲辭遞庚子遭內憂癸卯歷工曹  
正郎軍器寺僉正甲辰除平山府使無何罷歸邑民  
老少攀轅遮道如卧轍故事丙午除金堤郡守時邑  
久刈弊朝廷特選用公既莅任剗剔宿蠹修舉廢墜  
館傳繕治廩庾羨溢遂爲湖南完邑有一士人其父  
母並遭癘濱死斫指出血以灌口皆旣絕更甦又有  
良家女弱季遭賊變其母病在牀不能避以身翼蔽  
嬰賊刃幸而不死俱以貧窶季過而不能嫁娶公諭  
兩家父兄俾成兩美之合而衣裝諸需皆自官備南  
中稱爲美談庚戌除社稷署令辛亥轉軍資監判官



漢城府庶尹時歲大饑 朝家設賑恤廳以公爲郎  
公竭誠旬當終始不懈吏不敢欺人蒙實惠人謂公  
後世必有陰報賑訖出爲白川郡守旋陞海州牧使  
壬子引季乞遞監司重公治績終不許翌季癸丑始  
遞還乙卯以軍銜帶宣惠郎丁巳除掌樂院僉正己  
未遞職閒居蓋公自季至以後優無意於世淨掃一  
室以圖書花竹自適每時節輒招邀中表團欒杯酌  
盡日歡愉又倣洛社修耆老契以三九令辰作眞率  
會觀者稱豔至有工畫者圖其迹以傳於世癸亥秋  
寢疾雖彌留牀褥而不廢巾櫛來候者無親疎老少

莫不延入卧內談笑自如疾革謂諸親黨曰死生若  
晝夜焉吾有丈夫子三矣官爲州牧而壽至八耄吾  
又何憾哉以甲子五月廿八日終于城南之第八月  
葬于通津文殊山坐亥之原從先兆也初公伯父參  
贊公諱某與府使公同居一堂不蓄私財怡愉湛樂  
庭無間言爲搢紳家楷範公少襲庭訓惇行孝友與  
昆弟衣食共之日必晨興環侍左右一門之內藹如  
也旣連喪二親事參贊公及其夫人如一日及參贊  
公喪致哀如親喪二弟先逝語及輒淚下撫育諸孤  
以時婚嫁資裝無不備具仲氏僉正公葬地爲官吏



誣以犯禁其所後子昌基以弱年服衰就囚公時在平山任所馳詣自言家事任長願以身代竟坐罷不恤人義之姊妹早寡恤念尤摯源源迎養以至族人之貧窮者眷顧救濟必盡力焉莫不愛戴有急則必先歸公有遠兄弟並據崇班門闌甚赫公泊然自守不變其操及其敗也又不廢親懿人稱其善處與人交必傾倒不爲表襮如輿僮之賤遇之亦有恩意其和厚天性然也其居官也必以興廢蘇殘爲務雖朝命苟有不便於民者有所不從其在海州也朝家以庚辛大侵之後軍伍逋缺申明簽丁之令期會甚

急公以爲流亾之戶十無一還請待季遵行監司以聞籌司誣公請拿公公就理悉陳民情之可矜上特命還任仍寢前命又命下諸路一施之遠民皆頌公德尤長於剽煩理劇以剛明威惠著稱一道難平之訟輒歸於公即辨曲直負者無寃金矢之入用補民役一無所私家世清貧及屢典大邑無所增殖焉公平生不爲崖岸之行而自在科場秉心不苟有人所難者屢捷解額聲華藹蔚皆謂當朝夕發軔而竟蹉跎不遇終局於蔭仕不得大有所展布知公者深爲公慨惜焉公娶彥陽金氏安州防禦使贈左



明齋遺稿卷三十九  
贊成浚之女婦德甚備生二女而逝與公墓同岡而  
異墳再娶完山李氏士人文炯之女生一女三男男  
長卽伯基次仲基次季基女長適士人鄭洙成次進  
士俞命弼卽市南之仲子也季宋徵殷文科直長側  
室子潤基伯基二男曰禎祥女婿曰沈達賢季基二  
男曰禎禕女幼鄭有繼子宇柱承文正字女曰韓永  
叙俞有一子曰敬基而天女曰李厚坤宋有五子一  
女曰正明進士曰成明餘幼潤基二男曰裕祺銘曰  
古者論人曰賢曰能 賢由德選能以才稱 我觀  
閔公庶皆有之 以位以職奚處不宜 曷不大闡

用屐遠步 官不稱器業未大措 惟享有壽寔娛  
晚景 畱其餘祿以遺子姓 乘化無怛達命有言  
有欲知公尚徵斯文

刑曹正郎李君墓碣銘

故刑曹正郎李君公權字平仲其先公州人有諱明  
誠高麗監察御史入我 朝不仕隱于伊川山中以  
終四世而至諱慶祉 贈左承旨是君之高祖也曾  
祖諱鍵少有高才晚登文科官止司導寺正時論以  
爲位不稱德也祖諱長郁承議郎考諱楫 贈戶曹  
參判妣坡平尹氏洗馬瑄之女君以 崇禎辛巳生



兒時俊秀踈眉目文才出衆及長與其長君公幹貞伯俱有聲於場屋癸卯中司馬兩試癸丑登仕路內則濟用監參奉司宰監主簿刑曹佐郎內膳寺主簿義禁府都事漢城府判官外則順安江西新溪縣令丙子復入秋曹爲正郎八月卒於官得季僅五十六十月葬于仁川蘇來山向辰之原君孝友出於天性事親曲盡誠愛務悅其意如古人嬰兒之戲事兄怡怡和樂到老如一其丁憂也雖溽暑不脫纓經人以爲難前後任職居官謹守繩墨絕去干請不以產業爲心唯親舊之窮乏者隨力周救爲縣東吏响民勸

學祛弊所歷皆有遺愛順安民立石追思之先是參判公流落海西及得君兄弟與尹夫人計以爲鄉曲非所以居子也遂挈入京師僦居食貧而資君兄弟以遊學君兄弟晝夜勤勵孜孜不懈念門戶之衰替必欲立揚以慰兩親期望之意其於舉業用力不輟而竟不得一第噫其命也夫配咸陽呂氏領議政聖齊之女生三男一女男曰燮瑩煥婿曰尹仁教燮三男一女延世安世觀世仁教三男二女東鼎東輅餘皆幼拯與君爲中表兄弟同出於司導正府君早喪慈氏於外黨親依之情異常願以屏蟄一方不能



源源相從為歎豈料君之少我十餘歲而乃奄忽先逝耶燮等以墓文見屬不忍為而亦不忍辭也遂最而銘之銘曰

文未大闡數何奇也 壽未遐享又可悲也 唯其懿行孝且友也 我書其實可示後也

刑曹參議金公墓碣銘

公諱重鑑字伯珍姓金氏系出新羅有諱宣平以古昌城主佐麗祖討甄萱策勳為太師寔為始祖古昌今安東也子孫遂為安東人由太師以來珪組相襲至諱得雨八 本朝為典農正四世而諱永銖官至

掌令生承旨諱瑛承旨生別提諱生洛是公之高祖

也曾祖諱奎報 贈左承旨祖諱樑 贈吏曹參判

考諱光燧多幹局累典郡邑官至同知中樞壽九十

一以公參原從勳 贈吏曹判書妣 贈貞夫人全

州李氏廣平大君諱璵之後監役諱倬之女也公以

萬曆壬寅四月二日生於漢京北部里第生未十日

有大虎夜入家中筮于日者曰兒貴命也虎報吉非

災也公生而秀異才氣過人稍長文思日進十六委

禽于僉知李公植立之門李公謂曰君氣象不凡而

但血氣為用當循繩墨仍授以小學書公感其言折



節受學痛變舊習晚季常曰吾之不外馳外舅之力也甲子司馬丙寅補集慶殿參奉不就己巳除恭陵參奉癸酉擢文科選入槐院乙亥陞典籍移刑曹佐郎冬歷司書正言直講丙子扈駕南漢以督戰御史監北門軍丁丑春拜忠清都事同知公方任沔川以公格遞拜戶曹正郎移持平戊寅春以書狀官往瀋陽六月還拜持平時清陰金公爲羣小所構掌令李炆發遠竄之論公劾之獻納崔繼勳反劾公九月出補北青判官五載棄歸邑人豎石以頌之乙酉敘復典籍俄拜持平疏陳時弊秋奉命試士嶺南

丙戌春爲兵曹佐郎正郎秋選玉堂拜修撰校理薦銓曹移獻納戊子又以試官赴湖南己丑秋陞弼善移掌令庚寅遷尚衣院正己還掌令夏修撰俞公棨坐論仁祖廟號竄北邊公陳疏力救出補公山縣監以前官仍任還遞九月又出昌原府使有獷賊公捕誅之辛卯陞通政癸巳以親季八十引國法呈遞甲午拜刑曹參議不赴四月再除冬爲養求爲南陽府使乙未秋遞歸戊戌冬又爲坡州牧使翌季春罷庚子冬拜同副承旨以病陳疏辭遞出通津縣監壬寅遞歸癸卯以親年滿九十捲家歸鄉絕意宦途朝



夕侍側冬拜揚州牧使甲辰又拜承旨皆旋遞又拜高陽郡守十一月丁外憂公年已踰耆而執制過固幾不能勝丁未服闋拜承旨遞拜豐德府使以閏四月八日卒于府舍八月葬于交河治北炭浦午向之原從先兆也公氣宇軒豁風度凝遠美鬚髯簡言語入望之知其爲偉器平生自守未嘗俯仰於人以故立朝無親比者北青氓俗獷悍難治兵亂以後百事廢弛公練達吏事知民疾苦釐革積弊治績茂著時呂公爾徵爲監司大稱嘆曰兩界監司之材也趙公啓遠素器公公在昌原時趙公按嶺南咸安有大訟

久不決歸於公公據前後文案分析曲直以報趙公題以快若披雲觀天後嘗笑謂曰頃水原缺粹吾薦公無應者有一宰云淳謹可任徒知公之淳謹而不知其他此公不事交遊之致也公自丙子亂後慨恨時事斥賣京第就先山下構數間草屋每遞官則歸之朝夕屢空而未嘗營求宦情素薄手書韋世康祿不須多防滿則退季不待暮有疾僂辭之語于壁其發於吟詠者無非退閒止足之意唯以親養勉赴外任常戒子曰文職止於我足矣陰官一縣宰亦可又曰吾上奉老親自奉不可厚雖有肉味毋過一器常



以綿布爲衣袴至六十始服紬常曰當守分養福以遺子孫幼穉之在膝下者雖慈愛甚至而有過不少假借與鄉人語只談田野間事馭僕隸有恩常曰奴主以義合者不可一任威猛飢寒勞苦厚加顧恤有病必問醫救療初任北青時用刑頗峻有殞命者晚季常悔之性本嚴毅而居常更和愉雖下賤亦得盡其情少時頗有酒量五十以後不復飲於文有鑑識觀短札絕句亦知其前頭得失如筆法音律百工制造不甚留意而自皆精透其通達博雅得於天賦者如此嗚呼公持身謹慎莅官清白待人接物一以公

平忠恕爲本遠勢利執謙退名位不滿其德吾叔父石湖公雅與友善嘗有書曰固知所存泊然榮辱二字斷置已久而任世道者豈得辭其責哉蓋知公之心而惜其抱屈也淑夫人李氏讓寧大君禔之後天性淑哲聰悟絕人考僉知公教以古今嘉言善行以此婦道甚備類可爲閨閫模範公素清謹門無私謁夫人內贊其德終始如一尤致敬於奉先每祭祀必躬莅諸具坐而待曉生於萬曆己亥卒於戊子與公同墳先葬而祔于左舉一男一女男曰命碩進士縣令女適進士徐文郁側室子一命頤女三鄭高漢



申命鼎李盛蕃其婿也縣令娶參判李行進女生五男三女男夏成夏亨夏貞夏明夏英夏明進士齋郎女長適府使李喜澤次成至憲次李真遇側出四男夏精夏清夏平夏生一女李謹徐文郁一子曰宗斗命頓一男一女鄭高漢三男申命鼎一男三女李盛蕃二男夏成三男一女敏甲俊甲顯甲李夢相夏亨二男三女致甲履甲具鼎元李顯相李慶守夏貞無子以弟子相甲為後夏明一男一女瑞甲成德海夏英四男聖甲生員相甲范甲禹甲成至憲二男二女斗錫箕錫李昌彬梁一揆李真遇二男二女匡輔餘

幼夏精三男夏平三男夏生二男二女李謹一男三女內外曾玄七十餘人不能盡載公以兩世獨子蕃衍至此亦盛矣哉縣令君記公遺事請銘於石湖公既諾未及成而卒公之孫夏成等今以見屬拯雖不及拜公而先人丘墓亦在交河與公所居不遠自少聞公之為厚德醇行長者而心慕之近又與公之諸孫連姻情義不敢辭謹最其狀而銘之曰

孝慈之篤清慎之守 儉於自牧恬於進取 惟茲懿德公乃兼有 又富於才天畀寶厚 而嗇其施孰識抱負 位止三品年未中壽 畱遺餘祉保艾



爾後 有劉在石尚徵悠久

參奉沈公墓碣銘

公諱之灝字澤之姓沈氏青松人麗末有諱德符官至左待中封青城伯公其後也高祖諱光彥吏曹判書諡胡安公會祖諱錦司憲府監察 贈吏曹參判祖諱宗忱通政府使 贈議政府左贊成考諱使繕工監監役妣晉州柳氏開城經歷諱楯之女公以天啓四季癸亥七月一日生幼有至性五六歲時已能端坐親側應對惟謹父兄以其清羸善病不爲課督而自好勤學見先賢格言必悅而慕之季十四兩

兄歿於癘疫一家皆避出而公獨留喪側親自殮殯呼痛哀傷鄉鄰咨嗟以爲庾袞不過也弱年從趙治谷克善學小學四書家禮趙公深加獎異二十四遭外艱二十九遭內艱前後居喪哀戚過禮公素羸病人謂必難支保而終不至於滅性莫不感歎公既失怙恃又連遭諸兄之喪自結城移寓於青陽蓋爲外姑多病其繼後子乃公之姊子故爲相依之計也從子早孤者數人公皆率來育養教誨如己子焉某年以薦除 長陵參奉初以不謝爲未安欲應 命而終以老病不赴公自二十季來至親之喪無歲無之



公素篤於恩愛不能自堪然自以衰境傷生亦非全歸之道節情理遣人服其定力己卯正月偶感微疾以十八日終焉以其季八月葬于洪州湧川面求音坊辰向之原公爲人潔淨恬淡無一點塵俗少時嘗入科場見雜亂之狀遂不復赴舉早歲律身峻整頗有稜峭見人非違若將浼焉中年以後自以氣質褊急要濟以寬緩大書弘大平粹四字于壁上以自警待人接物一出於和厚嘗自慨然曰士生斯世抱負不輕而受氣甚薄身嬰重疾旣不能用功於爲己實地又不能隨衆舉業爲門戶計惟守靜保拙細繹舊

聞爲寡過之人足矣又嘗曰口談聖賢而行不揜言焉用學問爲哉居憂時取家禮擊蒙要訣喪禮備要講究而遵行之晚季涵養純淡於經傳及宋儒諸書玩索彌勤不以季老而自弛也所居有泉石之勝每至春暮風和秋晚涼生之時與童冠或山僧逍遙閒適於其間以自遣嗚呼如公者眞古所謂隱德君子者歟公配咸平李氏監察諱竣之女也與公偕老五十八季相敬如賓配德無違治家勤儉具有法度先公三季卒壽七十三葬與公同塋舉二男六女男益東次益來進士女長適黃廩縣監次洪量次南宮壑



次鄭齋良次主簿李延會次參奉李喜相外出頗繁而兩子俱時無嗣續人又疑於福善之理焉拯與公未曾識面而公之從子益章從拯遊見其雅飭知有濡染頃季適移寓於洪州龍溪與公居相近遂得盍簪不覺情之如舊也及歸尼山公又遠來相訪適聞姊喪悲撓不能一語而別其後更未一會復隔幽明至今思之每為悲恨今公之二子以拯之知公也來請墓銘銘公何媿只媿衰陋文不足以傳遠也銘曰維山有芝維谷有蘭 有美碩人此焉考槃 人莫我知馨香自在 于以銘之以發其晦

贈左承旨李公墓碣銘

公諱棟字郊翁姓李氏始祖恩言羅季為碧珍太守堅城固守麗太祖與有舊諭以天命人心約為婚姻封本邑將軍碧珍今星州也子孫仍為姓貫焉終麗代冠冕奕世自將軍十四世至諱希牧入我 朝判宗簿又三世有諱約東 成宗朝名臣歷仕 四朝諡平靖高祖諱有蕃參奉 贈承旨曾祖諱碩明郡守 贈參判祖諱喜善教官 贈贊成考諱尚俊兵曹參知 贈吏曹判書與兄忠肅公尚吉俱以直節重於世妣密陽朴氏僉知中樞府事諱胃之女中樞



公卽陰崖李文敬公籽外孫也以 萬曆丁未正月二十日生公公性孝謹自幼時一事一行不違親意弟承旨公墳少公一歲俱在髫鬢怡怡相愛然小有過差公輒正色不言承旨公不敢仰視至淡謝然後乃已及長厚於親戚恭於待人且不喜芬華寡言語皎潔峻整儕流皆敬重之學於家庭博覽羣書常忘寢食嘗上寺讀書有親友來訪公謝曰故人遠來豈不欲情話晷刻廢業恐違嚴訓卽還對冊與諸友會做時一篇未圓之前則雖千言萬語喧聒於前而若無聞覩既卒業始略加酬酢八庠製偶一見屈後不

再赴親朋爭勸起而終不變其持心之堅固處事之不苟類此己巳遭內艱哀毀踰制羸瘁成疾數季沉痾竟以乙亥二月廿四日不起季纔二十九判書公對弔客嗚咽而言曰吾爲安東時造一文房器送之兒還送曰此雖微物孰非民力不可以浼大人政吾兒志行如是而天奪之速吾安得不痛也噫亦可見爲親之至誠矣初室林川趙氏參判希逸之女資性端明見重於舅姑生於辛丑季二十三卒繼室全義李氏都事耆俊之女清江公濟臣之孫莊肅孝敬婦德甚備平生事行多有人所難及者親黨皆稱女中



君子生於丙午卒於丁未生二男長志雄漢城庶尹  
次志傑僉知中樞內外孫曾玄五十餘人以其各具  
於庶尹僉樞兩公碣文此不盡載焉公葬于忠州西  
德面蔓山亥坐原乃先兆也趙夫人墓在楊州蘆原  
贊成公墓側李夫人墓在公墓後公歿之四十六季  
以僉樞公原從功 贈左承旨兩夫人俱 贈淑夫  
人嗚呼公既早世無顯蹟可傳拯後生也亦未及一  
拜於公言又不足以稱述幽蘊然文不必多事不必  
備只孝友之誠敬謹之行簡嚴端確之操勤篤敏博  
之學亦足以貽子孫不食之報矣謹撮其狀而爲銘

曰

名家令子如玉如金 礪操劬業炯炯一心 夫既  
生之若以有成 云何不淑反齋其齡 惟天福善  
乃理之常 宜其子孫既多且臧 宰如之丘有碣  
數尺 于以銘之後人是勗

掌令趙公墓碣銘

公諱晉錫字汝三漢陽趙氏也麗代有判中樞諱岑  
是爲鼻祖世襲圭組入我 朝有諱末生事 太宗  
世宗長本兵典文衡諡文剛文剛之仲子諱瓚司直  
季子諱瑾觀察使觀察公之四世至 贈判書諱連



孫無子以司直公之五世孫諱肇爲後 贈左贊成  
寔公之曾祖也祖諱存性遊牛溪門下情義甚淡知  
敦寧謚昭敏考諱啓遠刑曹判書謚忠靖 贈領議  
政妣平山申氏領議政文貞公欽之女也公以 萬  
曆庚戌十月乙未生纔有知昭敏公教以義方髫髻  
已儼若成人未成童淹通經籍二十四陞上庠庚辰  
筮仕歷 昌陵參奉典設司別檢司饗院直長義禁  
府都事出爲任實縣監廉明爲政譽聞旁達繡衣以  
治最聞己丑擢庭試公自弱冠屢選公車至是始釋  
褐人謂之晚辛卯由兵曹佐郎拜司諫院正言上疏

言時政得失有曰內司冒屬者宜繩以叛主之律而  
殿下特令勿治是開叛主之路也豈有誨民叛主而  
能治其國者哉又曰向者從祀之請雖未能遽從宜  
示優容而反下 嚴批至有罪不容誅之教歷觀前  
史未嘗見刑戮待士者也又曰 殿下惡偏黨之習  
務欲兩全之夫不辨其是非曲直而只以調停爲主  
則其所以調停者反滋起鬧之端矣又曰久任責成  
要在得其人焉苟非其人愈久於任而愈害於事也  
語皆切直時議多之兼春秋館記事官差 仁祖寶  
錄廳郎廳壬辰出補公山縣監未幾罷歸 上以黃



州凋弊 別命擇差長銓者素不相協遂以公應選  
為判官旋怵公議而白留之俄拜正言又移兵曹正  
郎甲午春移司憲府持平夏陞掌令修撰洪宇遠應  
旨陳疏乞釋王子王孫之罪謫者而語多觸犯 上  
語筵臣宇遠疏語絕悖而臺臣寂無一言可慨執義  
洪處大遽發請罪之論公爭曰凡人主聽言之道言  
雖可罪垂恕然後可以來羣諫而集眾策况於求言  
之初已有不罪之 教乎宇遠疏辭雖謬戾其心出  
於無隱則豈可承順 聖旨追論於數日之後乎大  
司憲李時楷上疏斥公公亦自劾還斥時楷 上震

怒 特命削黜公出次西湖未幾大夫人疾篤公不  
得入省過用憂慮寢食俱廢踰數日吐血數升而疾  
遂作竟以是年八月二日卒計聞 命復官爵致賻  
如儀九月權窆于廣州丁酉二月葬于全義中巢洞  
坐乾之原公自幼孝謹有時受責於父母必反躬自  
訟或至達夜不寐忠靖公會在南原遭疾阽危公不  
解衣者三月對醫論證輒淚下邑人感其誠孝幼時  
忠靖公自書三綱五倫與他格言童蒙可先學者於  
一帖子以授公因語趙簡子授簡之事曰汝為無恤  
無為伯魯公常自誦習終身不失臨終手付其子曰



此吾嚴君手蹟汝宜寶藏其敬親不憚類是公有四弟而與仲氏觀察公龜錫齒相近比肩階庭孝友湛翁忠靖公與申夫人嘗相謂曰家督有人足以世吾家矣公爲人溫厚質實平生未嘗有近諛之言干名之行與人交必取端方之人居常謙退若不可當事而至激於義勇往不撓及立朝慨然有格王正事之意見 君德過失朝政闕遺輒憂歎彌日入臺未幾己振譽諤之稱未及再用而遽終一世皆爲之歎惜焉公精於筆法伯舅東淮申公嘗曰碑版之役當屬是甥云淑人海平尹氏同知就之之女領議政斗壽

之曾孫也有婦德事舅姑克謹處諸姊妹妯娌之間咸得其懽後公十七季辛亥十月二十八日終祔葬于公墓之左子泰期牧使泰開進士女適縣令金載文側子泰璧牧使有二男弘彬益彬參軍泰開無子以益彬爲後金載文一女歸黃處義弘彬三男益彬一男一女皆幼泰璧三男三女公與拯之先人同庚自少相善又同季進士嘗攜其弟議政公師錫訪先人於石江之上拯實侍坐而覲德焉公口吃而言暢氣貌恂恂先人與之晤語甚款至今追思如隔晨焉牧使記公事行託拯以墓道之文老病昏陋初不敢



當而顧以先誼之故不敢終辭謹最其狀而係以銘  
銘曰

世家胄子明廷憲臣 孝篤懷簡忠著批鱗 云胡  
不幸壽未中身 當其疾革念結君親 嗟公志業  
中道沉淪 有嗇有贏奈命不均 源深瀾遠餘慶  
方新 有刻在石以俟後人

文化縣令李君墓碣銘

余於往年為平仲墓文矣豈料今日又銘貞伯之墓  
耶余與二君俱為司導寺正府君曾孫我外祖生員  
府君即君之祖承議公之弟也故君與余為再從中

表自少相親愛君兄弟皆少於余而相繼奄忽獨貽  
我後死之悲何耶君諱公榦以公州李氏故名以公  
吾先君子之所命而貞伯則其字也平仲則君之弟  
公權也李氏起於麗末有諱明誠為監察御史入我  
朝不仕隱居伊川山中以終四世至諱慶祉 贈左  
承旨是君之高祖也曾祖諱鍵即導正公少有高才  
晚登文科位不稱德祖諱長郁承議郎考諱楫 贈  
戶曹參判妣坡平尹氏洗馬瑄之女也君生於 崇  
禎丁丑四月四日幼挺秀不羣未十歲能綴文作句  
輒有警語時參判公流寓海西尹夫人賢而有識慮



明齋遺稿卷三十九  
謂鄉曲僻陋不可居子請參判公捲入京城餽屋食  
貧以資君兄弟遊學未幾文譽蔚然癸卯與季俱中  
司馬兩試君念門戶衰替必欲立揚以繼渠正公之  
業日夜勤勵記誦述作功力兼至名於場屋號爲巨  
擘前後屢舉或居魁選而竟不第儕流莫不歎惜以  
爲數奇也甲寅除長陵參奉丙辰遷長興庫奉事  
戊午遷司饗院直長爲同僚所忤而遞庚申復漢城  
府參軍八月丁外憂居喪盡禮雖盛暑不脫纓經甲  
子復禮賓寺奉事尋換廣興倉副奉事丙寅遷尚瑞  
院副直長尋陞寶又陞造紙署別提移拜工曹佐郎

丁卯爲文化縣令莅任三載以清勤寬和爲政勸課  
士子蠲減民役至於親屬之窮乏者捐俸賙給各盡  
其誠及遞歸朝夕之資於人依舊也乙亥復內膳寺  
主簿又爲奉化縣監歲值大侵餓莩載路除出朔廩  
殫心賑救民賴以蘇息邑風好訟名稱士夫者亦爭  
入官門不以爲羞君揭榜以示之曰惟利是競躬進  
訟庭恥也事係爲先之外絕勿親訟自是好訟之習  
幾至於變己卯十一月感疾十一日終于任所一境  
悲號持奠以送者塞路明年二月葬于白川釜鼎谷  
先塋下已向之原君爲人和裕未嘗有忿懣之色孝



明齋遺稿 卷三十一  
事兩親奉養承順靡不曲盡季過六十尚爲嬰兒之  
戲平生無私蓄如祿俸及凡有所得盡獻于親唯親  
意之所欲用昆弟友愛終日怡怡季先亾撫恤諸孤  
教誨備至其於遠近族黨亦一視而厚遇之尤謹於  
祭祀廢生辰復時享晨謁如禮終身不憊居官約己  
奉公處家不事產業此皆君之實行也君再娶俱坡  
平尹氏前淑人務功郎糾之女也慈仁有婦德式禮  
無違卒于甲辰七月六日壽止三十亦葬釜鼎谷距  
君之墓數十步生二男一女男燦早死次燦女適尹  
世綱縣監後淑人忠義衛赫之女生二女適趙正純

士人一在室燦二子長胤世爲燦後承重次幼尹有  
二子一女趙有一女銘曰

嗟君之賢自奮于身 績文取仕以振衰門 內踐  
郎署外綰銅章 馳爵顯考榮養萱堂 平生孝心  
可謂少仲 官資崇庠何足復論 唯其不羸可遺  
子孫 益蕃以闡尚徵斯文

左水運判官韓公墓碣銘

公諱聖翼字汝翼姓韓氏其先清州人有諱蘭佐麗  
祖位太師是其鼻祖而我 世祖朝左議政襄節公  
諱確爲九代祖也高祖諱敬男 贈領議政曾祖諱



應寅佐我 宣祖位右議政封清平府院君諡忠靖  
祖諱德及累官州郡襲封清寧君考諱壽遠沙溪金  
文元公之外孫也行業淳備官至牧使 贈吏曹參  
判妣咸平李氏莊襄公從生之後 贈左承旨龍溪  
處士榮元之女也公以 天啓辛酉六月十四日生  
幼有美質稍長受業于慎獨齋金先生之門先生於  
公爲外從祖也誨以文行淡加獎異旁治舉業志欲  
立揚而悅親平居手不釋卷累試輒居上游而卒不  
諧先輩莫不歎其數奇歲己酉丁外艱庚戌疊遭內  
憂柴毀幾不支服闋遂棄舉業絕意進取唯沉潛經

籍尤好自警編及朱子書到老不輟先是公之婦家  
在湖西之飛鴻縣境公因僑居于眉山下癸丑喪耦  
卜葬于洪州治之東上田鄉而移居之遂爲終焉之  
計公之兄弟隨公而來寓隔麓鼎居公以暮境團圓  
爲至樂得一味必與之共一日不見則至扶杖徒步  
往會癸亥以薦除 崇陵參奉公以兄弟皆已從仕  
西歸黽勉拜 命甲子坐微事罷南相國九萬素知  
公行義丙寅春復薦除繕工監役其季六月以勞陞  
六品除尚衣別提九月移左水運判官盡心奉公漕  
運往來雖值暑雨未嘗少休水站需用專責漕卒實



爲難堪之弊而爲是任者率因循舊例莫之知恤公特報該曹爲減其徭三之一其他應入者悉從簡省漕卒輩感悅頌德戊辰十二月廿六日以疾卒于京第明年己巳二月返葬于洪州與淑人同塋焉公天性慈仁恬靜而淵源所漸早聞科舉外有用心處故其律身淳謹至老如一而處事接物俱有繩墨其事親也和順溫柔逮罹巨創季已向衰而執制甚固朝夕拜墓悲號祈寒不廢追慕之誠久而彌篤每遇忌辰必別具饌品以助祭其處兄弟也極其恭愛常曰同氣之間怡怡爲主若有一毫乖忤之事則便傷於

友于之情矣以此未嘗有拂言戾色常痛季弟贊而早逝撫恤孤姪猶己之子俸祿雖薄必分而資之其於宗族敦睦加人居家以簡淡自牧淡惡華靡若見崇財嗜利之輩則不翅若浼遇人窮涸亦傾儲以濟之未嘗屑意於家事故活計常蕭然寒乏雅不喜聲色常陪徃牧使公任所或經時月而未嘗一近女色晚季鰥居始卜妾而涖之以莊庭無間言與人交待以悃款不事表襮朋儕皆敬慕之性本溫良與物無忤而至於是非善惡之分則辨之甚明守之甚確人不能撓奪常憐諸子早失所恃慈愛甚至而不弛教



督之方居常訓戒嚴正使之擇師友務本實不昧於所向疾革招諸子益致丁寧之意臨終又以友兄弟勤學業爲囑言語了然至屬纊而不亂嗚呼此皆公之實德也蓋公自少篤志肄業文學有餘飭躬自修行義無玷而唯其安分守靜恬於名利故世罕知者垂老薄宦祿不稱德嗚呼其命矣夫淑人李氏吏曹判書諱山甫之曾孫也考諱峻成社稷署參奉妣宜寧南氏生于天啓甲子慈良穎悟識慮如男子季十六歸于公內治甚整平生絕禁巫覡常歎世俗婦人之爲其所惑南氏寡居季老又喪獨子淑人侍養

極其誠孝而至於親家凡百未嘗擅便每推讓於弟婦弟婦淡以爲感弟婦有二女淑人憐其早孤撫育無異己出及長請於公爲擇婿而嫁之而後嫁己女宗族莫不歎服己酉哭天慘悼因致疾積季沉綿每默禱于天曰老母在堂天其哀憐假我殘命于親在之前俾終其孝則雖死無憾已而果瘳至癸丑正月南氏卒淑人治終事至襄葬諸具親自營理靡有餘悔而後前病猝復乃以其年四月九日繼終人以爲至誠格天得如病裏所禱云有五男一女長曰配虞有廢疾早夭次配夏正言以公命繼伯父後次配商



進士不幸短命次配周進士監察季曰配漢生員女  
適尹自教側室子女各一配宋天女幼配夏三男二  
女曰師孟生員師哲師善女適李德淳一幼配商二  
男曰師德師得配周三男二女曰師百生員師萬進  
士師億女適崔昌會餘幼配漢一男幼尹自教一男  
四女曰東洙女適李思齊李普元餘幼拯與公世誼  
甚厚而猥荷愛予尤至曩又往卜公隣從遊益親及  
拯以淺妄獲罪於時親舊多絕交者公介然特立於  
論議波蕩之中終不少渝至有棄官遂初之意竊嘗  
歎息以爲如公之和外而剛中當於古人中求之配

夏等託公墓道文字情義不容以不文辭謹最而敘  
之係以銘曰

亞聖有言欲寡心存 人無外誘方保天真 我觀  
於公冲襟淡然 半世棲遲自適林泉 末路微官  
聊以隨緣 安其素履不爲物遷 樂哉斯丘嘉耦  
同原 于躬不羸以昌後昆 我文雖質惟表其實  
有欲知德不在斯刻

掌令李公墓碣銘

公諱善源字敬甫德水之李自高麗中郎將敦守始  
至工曹參議揚八我 朝左議政持公之六代祖也



高祖諱河進士壯元 贈吏曹參判曾祖諱安訥僉  
知中樞 贈左贊成祖諱椿原州牧使以孝 特贈  
左承旨考諱觀夏振威縣令 贈吏曹參判妣全義  
李氏右議政諡孝貞公行遠之女也公生於 崇禎  
壬申四月三十日幼而岐嶷動止如成人纔知讀書  
便能綴文十餘歲王父牧使公命賦觀漲詩有納此  
千渠細添成四海多之句鄭東溟大稱之曰筆力雄  
逸有東岳風骨二十二遭內艱三十六遭外艱前後  
居憂毀瘠成病幾至滅性三十八擢庭試文科公文  
詞夙成少已有名於儕友間至是時釋褐人皆謂之

晚自承文院正字著作博士成均館典籍直講兵曹  
佐郎正郎司諫院正言海運判官司憲府掌令永平  
文義縣令通禮院通禮止蔚山府使此公之內外履  
歷也濟源察訪晉州牧使不赴豐基郡守未赴而罷  
公立朝十五年矣淡於榮利不喜交遊進取且見黨  
論漸痼世道日非常自慨然曰吾豈能隨人俯仰以  
求容於世也故末季除拜俱是謫宦下位而隨處而  
安不見幾微人罕有知公之所存者矣蓋公乙卯除  
諫職未久卽遞丙辰爲掌憲適兩司發金相壽恆加  
罪之啓公力不能止引避而遞至於外補而被參後



來時議猶以避辭不峻爲咎終致仕路之顛躓焉公天資和厚忠信寡嗜慾平居簡於言笑不與人款密恂恂如也孝友之行出於至性逮事祖父母曾王母承顏順志奉養備至每當享祀先期區畫無有闕遺盡其愛敬之誠奉承諸父敦睦宗黨恩義兼摯持身清素不好芬華慮事周詳行己無僞在文義時適燕歧縣革而來屬兩邑俱在路傍凋弊而多責應公撫摩盡心爲政廉平民服其靜淨至今追思在蔚山時傷於水土疾已病矣而猶不自暇逸曰旣當其任何可怠其事乎其所守如此公與仲弟郡守公善淵季

弟承旨公善溥志意相合一室書史昕夕怡愉常曰兄弟仕宦至侍從榮已過矣盍與同歸沔陽杜門却掃爲養病終老之圖乎即公之素志也以甲子五月十九日卒官嶺邑七月某日葬于海美縣北僉樞公墓右坐酉之原噫以公之厚德仁心壽纔中身又無嗣取仲弟之子爲後福善之理誠不可知官位之崇卑又何足道也公配豐城趙氏判書忠貞公珩之女所後子德欽娶別提沈麟瑞女生二男二女男長曰海宗餘幼嗚呼公之先府君縣令公與拯之先人世誼甚厚爲我地主也過從尤慣其時公兄弟與吾兄



弟常侍左右公又時會我墳庵同榻或至數月公踈  
髯方面襟懷直率與之處久而益見其可親也公歿  
後二十年公之嗣德欽狀公事行來請墓文於余余  
年老昏耗已廢佔畢未免固辭德欽往返至三而不  
止其意以余爲知公也遂不得已謹次而銘之銘曰  
寬厚冲靜天賦之美 孝友敦睦家行之懿 淡于  
營爲踈于名利 任真隨分流行坎止 人或謂迂  
我自樂此 仲氏清儉亦復絕特 此令兄弟何處  
可得 蘊德韜光以適于丘 我筆無華曷以闡幽

僉知中樞府事李公墓碣銘

公諱志傑字秀夫號琴湖星州人上祖恩言高麗開  
國功臣其後金紫蟬聯入我 朝少宰約東以德行  
廉白恬退著名諡平靖三傳而至諱碩明郡守乃公  
之高祖亦有廉操人比之清水曾祖諱喜善以經行  
薦授童蒙教官祖諱尚伋兵曹參知與兄忠肅公尚  
吉俱以直節重一世考諱棟有美質弱齡丁內艱以  
毀歿後贈左承旨妣嘉林趙氏全城李氏俱封淑夫  
人李氏儀賓都事耆俊之女清江公濟臣之孫以  
崇禎壬申五月六日生公三歲而孤養於季父承旨  
公家自兒時聰穎嗜書不煩提諭文藝夙茂弱冠陞



上庠丁未遭內艱公既雅負雋望科第自謂可以俯拾必欲及高堂無恙時以爲一悅而竟不及遂爲終身至恨庚申除義禁府都事六遷歷四司陞工曹佐郎癸亥除高山縣監二季而罷歸丁卯春除司僕主簿秋除歙谷縣令以公格遞復內資主簿遷監察又轉工曹佐郎戊辰除盈德縣令己巳罷被逮庚午再繫辛未謫昆陽甲戌宥歸辛巳季七十以子侍從恩加通政資授僉知中樞府事明年考終於第壬午七月之八日也是季九月二十二日卜葬于忠州西孟洞栗里負酉原公風姿粹雅言論英發一時儕輩

咸推重在館學常爲士林主論甲寅 朝廷舉名行之士公與洪得禹李寅赫諸公同登薦剡蓋皆一世人望也乙卯以後謝舉屏迹西湖爲終老計及入仕路至赴縣以世祿之臣不欲辭 朝命而非其所好也前後居中外官常廉潔自律奉公守法無所撓屈至如民事軍政學校田結訟獄賑糶亦無不盡心力恪謹詳勤皆可爲後法列邑當賑政例轉販取贏以爲資公嫌其反權民利唯自削衣貶食以哺之在高山時以不從上司非法之令見黜在盈德時治土豪致斃者三人其家訴之至誣以近臘遂爲時輩所構



陷經季在縲紲公冰蘖之操素著窮查而無所得終  
只以濫刑遠配在謫闔戶靜坐唯以墳典自娛忘其  
爲千里外羈管受環後數季 恩叙久靳議者謂廷  
臣宜白其寃公曰當時之脫禍今日之生還皆 聖  
恩何敢復爲干澤計禁諸子使不得開喙公之所守  
於此可見公孝友出於天性以早孤不及致養爲至  
痛奉慈夫人極其溫清甘旨之養及歿廬墓秉制仍  
成羸疾外除後猶守而不忍去者三年節日上塚亦  
不以衰老而或廢高祖以上二代先塋同在一山在  
邑時於四節祭高祖墓也輒並祭二代與伯氏少嘗

同居至中季築室於側近每昕夕相從未嘗相離教  
諸子姪必以義方尤嚴於酒色侈怙之戒非但於中  
表睦嫻備盡寒鄉踈族苟名在譜牒便披悃款款講  
宗會之法以篤親親之誼此皆公家庭之懿行也公  
守己靜拙平生無一介求乞於人人之有夏畦態者  
欲唾其面立心務明正不欺以此人有相欺者必淡  
惡痛斥至於偏黨二字不唯不置於心亦不一挂于  
口勉朋友戒子弟未嘗不在於此每日晨起盥濯整  
攝衣紳坐必正席淨掃一室終日無惰容題所居堂  
壁曰入吾室者勿言凡人善惡時政得失子弟論人



不善則輒責之曰言人之惡發人之私豈有德者乎及子之登第也賀客盈門乃愀然曰乃翁白首窮經終不能做而兒能做得豈不嘉哉而一許其身僂作憂患之始吾所以不悅於心及其言事外補也又夷然曰職責無內外民社無大小且以嚴程不可畱戒使過行而已嗚呼觀此數者公之爲人槩可知矣且他言行可傳者多不能盡載公於文無所不通而尤長於詩其所吟詠多爲人所傳誦有遺稿五卷藏于家總一千五百餘首噫此亦可爲一不朽矣配安東權氏封淑夫人生員順悅之女也舉五女二男男長

世瑾以持平出補陰城縣監次世璉女長適柳重榮次適進士魚史夏次適鄭萬津次適趙世望郡守次適柳昌晉陰城三男曰挺柱世璉三男曰挺楫挺霖餘幼魚有二男一女曰有寬有寅李夏榮鄭有繼子趙有三女二柳氏無嗣而天公歿之期年陰城述公事行縵經遠來請墓銘拯自少屏蟄雖不得從公遊而世諠旣不泛再從弟擇雅士也與公爲內外兄弟生時嘗稱道公不少揆公之從女婿也亦常言公行義甚詳且孝子之哀懇有不可終辭者茲忘其衰陋略撮其狀而繼以銘曰



士之處世貴得於己 實勝則孚名勝為恥 惟公  
本末有文與行 不銜不苟得喪惟命 襟懷清曠  
韻致脫俗 亦有朝評比之蘭玉 官不登顯壽未  
到遐 視德雖歉在我何嗟 有子克賢思顯厥懿  
我筆非華唯庶無媿

淑人慶州金氏墓碣

明村羅君顯道自述其太淑人之狀以書來曰先公  
之葬也先妣在堂事行不載於墓碣子其識之拯以  
衰病辭不獲謹讀其狀淑人慶州金氏高祖諱萬鈞  
大司憲曾祖諱命元慶林府院君諡忠翼祖諱守廉

僉知中樞 贈領議政鰲原君考諱南重禮曹判書

慶川君 贈左贊成諡貞孝妣貞夫人驪興閔氏都

正有慶之女淑人以 萬曆甲寅六月六日生自幼

言行莊肅處事正直貞孝公恆嗟惜之曰汝若男子

必大吾門十六歸于羅公事舅姑務適其意丁丑之

亂祖妣李夫人病卒於舟中四顧無助自饋奠諸需

以至舅姑衣服飲食之節皆盡其誠意無不如宜諸

小叔皆幼撫養勤至舅姑感歎曰流離險艱之際吾

二人與諸兒之保全專賴吾婦儻使子孫如吾婦誠

孝安得不昌參議公之謫寧海也含哀遠謫衰毀致



疾鄭夫人病亦俱劇淑人夜不解衣躬親執爨愈久不憊參議公患浮脹終季沉綿淑人侍疾焦憂及捐館祭奠凡百竭心營備恐祭奠時刻失於早晏以墨識屋柱以視日影終三年不差晷刻晝夜扶持鄭夫人所以將護慰安靡不曲盡羅公三弟皆早亾病時救視無異己子傾筭助斂襲具無所惜第二叔有遺腹子淑人以其別得婢爲其乳母後並其二女成券而與之羅公在州郡每念同氣窶貧分俸載送見親戚之寒餓者周卹甚勤淑人恐有傷廉之誚時以簡節之意進規嚴飭奴婢令內外隔絕不通商貨衙內

肅如也癸卯貞孝公及羅公連月卒逝淑人荐丁大戚哀毀已甚而奉奠敬謹式禮罔愆凡祭祀時雖隆冬必沐浴致齋掃灑室堂疏滌庭除凡諸器皿躬執漑濯婢僕亦使浣衣澡身務極精潔訓戒諸子必以義方小有差誤不小假借御婢僕惠而有威嚴禁讒諛之習家中和睦人無間言諸姊之間以和敬相待諸嫌終身事之如母凡言語未嘗過情與人書不過數行語簡而理當女婿金議政在銓時親戚欲受淑人書以求官淑人絕不許曰此豈未亾人之所爲乎平生不喜芬華奢侈之事嘗造細布納官受直以補



艱乏一日顯道告曰此物畢竟往虜中甚不可淑人乃悟曰果如汝言况先舅没身痛恨於丙子之變吾何忍爲此遂絕不復爲羅公之除鳳山也淑人曰此乃虜使往來之路何可往也他日得湖邑以教兩子於湖右諸賢之門可矣羅公服其義而高其見顯道無子淑人以碩佐之長子演爲後長子爲後違法例故自上言置于卓上下庭四拜而送之回啓蒙 允之下亦拜而受之其明達義理如此若聞 朝家處事有得失輒自憂喜曰內外皆世臣自不能不如此也追慕皇舅正直言必及之顯道之丁卯抗疏也人

皆知言出而禍隨淑人勗之以事一之義及其被竄也又寬譬之曰汝既執義而被譴吾無相離之恨矣須慎疾善往來可也此尤非婦人常情之所可及也癸酉十二月十八日以疾終壽八十明年二月以季運不吉權厝乙亥二月某甲祔葬于羅公墓左明佐不幸短命其妻宋氏亦自決以從之無嗣良佐顯道卽其字也以學行薦拜忠清都事有二女尹可教鄭壽期其婿也側室二男三女婿尹心教餘幼碩佐有氣志行義過人內侍教官亦早逝有二男長卽演次浚金壽恆有六男一女昌集戶曹判書昌協吏曹參



明齋遺稿卷三十九  
判昌翁主簿昌業昌緝俱童蒙教官昌立天婿曰李涉李師命有二女婿曰正言金普澤士人金龍澤嗚呼淑人之美德懿行孝子志之悉矣拯與顯道昆季有兄弟之義亦皆耳目之所嘗逮也嗚呼在室而父母稱其孝既嫁而舅姑稱其誠事夫子敬而箴訓子女慈而莊至其通曉於道理大體又有類乎讀書君子嗚呼豈非古所謂女士者歟茲敢最而敘之俾刻諸碣陰焉

漢城府庶尹李公墓碣銘

公諱志雄字萬夫星州人高麗開國功臣恩言之後世襲簪組入我朝有諱約束以德行廉白恬退著名小宰諡平靖即公之七代祖也高祖諱碩明郡守贈兵曹參判廉操世其家人比之清水曾祖諱喜善有經行童蒙教官贈左贊成祖諱尚伋兵曹參知贈吏曹判書與兄忠肅公尚吉俱以直節重一世考諱棟志行出人丁內艱以毀歿後贈左承旨妣嘉林趙氏全城李氏俱贈淑夫人李氏儀賓都事者俊之女清江公濟臣之孫以崇禎戊辰七月一日生公自兒時孝愛純篤八歲遭外艱執喪如成人十歲服承重喪從季父承旨公受學夙夜不懈及長以



詩文名一時二十七中司馬兩試三十一除 宣陵  
參奉陞繕工監奉事歷尚瑞院直長陞典牲署主簿  
移刑曹佐郎陞正郎片言折獄簿牒不滯諸堂上莫  
不稱歎時母夫人季高得一縣優養之願甚切而以  
曹例不得離在職二十餘朔終遭憂人皆傷之居廬  
墓下羸毀幾滅性外除後猶守墓不忍去己酉秋拜  
戶曹正郎旋遞冬拜造紙署別提移社稷署令宗親  
府典簿庚戌冬除加平郡守歲適大侵郡以畿內殘  
邑素無儲積公至誠經營或請上司移粟或勸諭富  
民出穀至於捐廩俸以助凡可以救活民命者無不

盡心爲之以此闔境賴以保存及瓜滿邑民請廟堂  
加畱一年立石頌德久而不忘焉丁巳拜刑曹正郎  
戊午除安城郡守旋罷庚申除榮川郡守三季以病  
遞癸亥拜尚衣院僉正其冬除金堤郡守適又值荒  
歉賑飢之政一如在加平時民削木書萬世難忘字  
徧一境豎之居五季終始如一丁卯罷歸己巳夏有  
宮闈變故公與於吳公斗寅疏仍杜門不出至甲戌  
除漢城府庶尹黽勉供職丙子遞戊寅除翊衛司司  
禦及解職居閒唯以圖書自娛辛巳七月十四日忽  
無疾而卒葬於判書公墓下負亥之原公天性仁慈



明齋遺稿卷三十九  
恭儉和謹周詳雖遇急遽之時未嘗動其心與人款  
曲不喜言人是非過失常曰謀人之事雖至微細必  
盡吾心然後方可謂之忠居家莅職必勤必慎居郡  
縣時常曰爲守令者當勉行朝廷所命七事而常媿  
其未能又曰使民耕種以時使章甫學業有程軍無  
闕額而民不加賦則庶幾不負於七事又曰鷹鷂不  
若鸞鳳或勸爲子孫立產業則曰清白傳家自有先  
訓渠輩當菑畬經訓以自樹立而已吾何以產業爲  
哉觀於此等言語可以知公之所守也公與季氏僉  
樞公友愛甚篤非各有遠宦之時則無日不會怡怡

之樂到老不衰每家居艱食之患人所難堪而淡然  
不以爲意愛諸從子女輩無異己子疾病憂患躬自  
勤恤親戚不問遠近敦睦無間公之懿德大槩如此  
配慶州李氏翊衛司司禦仁寶之女生稟端淑內則  
甚備爲宗黨所稱生四男二女男長世璜通政牧使  
次世球早歿次世瓘亦先公歿次世瑛有文行女長  
適尹揆薦經行爲參奉次尹焜早卒世璜一男一女  
男挺相女適柳級庶男二挺植挺樑一女幼世球一  
女適金聲大世瓘二女無男取弟世瑛次子挺樸爲  
後女韓德一朴徵賓世瑛二男挺郁挺樸一女幼尹



揆二男莊教英教女李錫祺尹焜二男就晚最晚女  
李潛挺相一女挺郁一男一女俱幼拯與公世諒不  
泛公之來南中也屢訪於窮谷勤厚之情常在于懷  
家弟推還自金堤言公遺愛在民至今誦其清德益  
知公之行義也公之子世瑛以墓文相託衰病不能  
為文字而辭不獲謹序次而為銘

有美其質稟則厚兮 有蔚其文才則茂兮 而不  
大闡命之畸兮 棲遲末路竟止斯兮 唯有天衷  
獨自保兮 世間升沉詎足道兮 墳簾相和暮境  
樂兮 一日觀化蛻塵濁兮 世積其餘以遺後兮

劉之于石可徵久兮



明齋先生遺稿卷之三十九

明齋先生遺稿卷之四十

墓碣銘

平澤縣監風玉軒趙公墓碣銘

嗚呼昔我先人嘗言曰趙斯文平澤公在城山門下  
以行義操履見許於函丈執守之確論議之正爲同  
門諸公所重又曰平澤公早及師門中罹奇禍士林  
不幸君子悲傷當世之操觚者宜有稱揚闡微之法  
而尚闕焉蓋師門遺矩務在謙卑退讓之道而希溫  
丈不欲自述先迹求顯於文人之手者抑或與楸灘  
吳公不令立碑之意同一揆耶希溫卽公之季胤滄



明齋遺稿 卷四  
江公之字也拯自幼獲承先人之教每於公感歎景慕之私不敢忘於中矣今者公之曾孫賢輔以公遺事來請銘拯學識淺陋衰耗又甚誠不敢當而念先人遺意不敢辭敬受而序次焉公諱守倫字景至豐壤人始祖諱孟佐麗祖爲門下侍中平章事後世冠冕不絕至諱益貞仕我世祖睿宗朝官至吏曹參判封漢平君贈禮曹判書諡恭肅乃公之高祖也會祖諱彭進士有文學早世祖諱宗敬弘文館典翰知金安老之奸力沮其再入爲其黨所擠而終考諱廷機以經學宣廟初久侍經幄卒贈副提學

妣晉山姜氏觀察使昱之女公以嘉靖乙卯生己卯中司馬甲申除慶基殿參奉乙酉遞庚寅除宣陵參奉壬辰因亂失職癸巳除繕工監役旋遞辛丑除童蒙教官甲辰陞漢城參軍乙巳除大興縣監丁未罷己酉除戶曹佐郎庚戌遞辛亥除平澤縣監壬子罹誣告獄以四月三日歿於縲紲之中壽僅五十七人葬于楊州治東廣巖里艮坐之原從先兆也公性聰穎自少見識超詣學於家庭已知爲己之學及長受學於牛溪先生謙恭篤實敬以持身誠以接物務得於己而無求於外早孤執喪踰制遂得重病事偏



明齋遺稿 卷四十一  
親色養備至得一甘旨喜形於色雖時食微物未及  
進於親廚則不食至於自奉冬夏一衣朝夕一飯猶  
以踰分爲媿家居整飭端坐終日欽欽爲教官時勸  
課訓誨嚴立規程進退拜揖一以小學爲法各隨其  
所長而教之至誠不倦雖祈寒酷暑講磨不輟是以  
門徒最盛或有贏糧僑居而從學者爲邑專以愛民  
奉公爲心不行私惠以要名譽春秋鄉校社稷祀典  
必潔誠躬行朔望望闕之禮非疾病不廢兩縣皆  
以善治啓聞及被逮平澤一邑之民盡皆奔走號哭  
曰豈以吾太守之賢而有此事耶嗚呼以公豈弟之

德慎言謹行親戚悅其敦睦朋友服其信義戰兢一  
心到老不懈聖人所言邦未道不廢邦無道免於刑  
戮者公實有之而乃不免於淫禍此一世之所以痛  
傷久而不能已者也癸亥 仁祖卽位特 贈左承  
旨遣禮官賜祭以滄江公參靖社功又 贈兵曹參  
判公嘗於湖西別業構小軒扁以風玉丁未還自大  
興又結數間茅屋扁曰晚歸擬爲終老之所而爲親  
養再赴縣邑志竟未就焉夫人東萊鄭氏左贊成大  
季之孫縣監善復之女也配德無違生於甲寅歿於  
己巳祔葬於公墓之左三男二女男長曰滌性至孝



壬子之禍哀痛過毀仍廬墓下數季而歿癸亥旌閭仲曰溢季曰涑即滄江公癸亥辭勳德學節行重於一世歷臺憲終尚衣院正 贈吏曹參判女長適司圃權鎮次參議李德洙季僉知李厚載滌一男曰從耘翊贊溢四男曰興耘僉知曰起耘達耘善耘一女南以亨滄江一男曰之耘縣令六女曰正字金益振申舅僉正李行夏韓如川判書朴泰尚李瑞翼司圃三男二女曰埤曰埤僉知曰埤曰李孝湛僉正徐必成參議一男一女曰判書弘淵判書金益熙僉知一男曰迴獻納內外曾玄多不能盡載先人又言牛溪

先生文集之編定也滄浪成公與門下諸公會於公所終始勘訂其爲儕友之所推此亦可見又言嘗與李公有謙談及前輩自言始受學於公爲之誦慕不衰茲皆家庭之所逮聞者並著于石末云銘曰

昔在聖門其科有四 以此觀人亦可倫擬 嗟惟趙公寔有至性 蘊之於躬庶幾德行 遭時不淑 迺隕其命 聖朝褒恤天固有定 世道一降夸毗 交驚 緬懷風韻何處復覩 宰如之丘有碣數尺 我述庭聞百世可識

全州判官權公墓碣銘



公諱侗字完仲始祖幸事高麗太祖爲太師賜姓權氏爲安東大姓八我朝有諱近贊成事謚文忠世稱陽村先生於公爲八代祖高祖諱愚牧使 贈大司憲曾祖諱礪司直 贈領議政祖諱兢副護軍考諱怙察訪妣某貫梁氏奇氏皆不育公以察訪弟副摠管諱恂之子爲之後摠管公配延安李氏參軍賚之女公以 萬曆庚戌五月一日生甫成童詞學甚茂聲譽著聞同開黃參判謹中見而奇之以其子僉正泳之女妻之癸酉遭摠管公喪哀毀踰制丁丑又丁察訪公憂時當亂後流離之際而易戚咸備壬午

中司馬丙戌除 昌陵參奉丁亥丁奇夫人憂己丑服除除 獻陵參奉又遭李夫人喪有大腫生胷間穴穿內漏飲食自其中出蓋前後草土十餘季積傷致重病見者莫不危之而踰季乃獲瘳人皆歎之以爲誠孝所感自壬辰至己亥三除義禁府都事典設司別檢再除戶曹佐郎出爲鴻山縣監有惠政以公格遞民至今追思之壬寅宣惠郎癸卯刑曹佐郎甲辰禁府都事軍資判官刑曹正郎曹是詞訟之地關節請託甚煩公一以公道行之訟屈者亦無冤言乙巳工曹佐郎正郎兼冊禮都監出爲全州判官監司



實兼府尹而以所統事多故州務例專委判官既地  
廣人眾且俗好爭訟難治最於南方公勤於爲政事  
無停滯常以節煩費恤民隱爲務屬歲侵割俸蠲徭  
民大賴之戊申春請暇歸家仍以疾累辭而道臣重  
違民情終不許不得已還任疾猶未已至秋彌留爲  
歸洛就醫之計中路轉甚至連山村舍竟不起十一  
月初三日也以翌季己酉二月葬于廣州月川里先  
塋下坐乾之原庚申 贈左承旨以子持參從勳推  
恩也公爲人忠厚坦夷不爲城府邊幅篤於孝友事  
父母左右無違雖在窮約竭力供甘旨祭祀之禮務

盡誠敬雖病不攝與二弟居飢飽苦樂必共之至於  
早孤庶姪輩皆撫養而嫁娶之遇宗族曲有恩意接  
人必以誠款是以人無親疎皆愛而敬之其居職一  
心奉公治邑以愛民爲本深惡矯情飾外苛辦鬻酷  
之政以故所到雖無赫赫聲而吏民俱便之居家泊  
然無所營爲先業之外不增尺寸戒諸子吾家以清  
儉傳業爾等盍思所以無忝也筮仕數十年未嘗趨  
奔競之途嘗自歎曰余早有求道之志而到老無所  
得持此皓首陸沉於簿書之間大是不堪早晚當歸  
葺溪上茅廬撫松採菊逍遙三逕庶不誤桑榆光景



矣蓋公月川所居有泉石之勝與再從弟司導寺正公諱儁占溪上下而住焉每以杖屨相從公嘗有詩曰天下無男子中原有女真而寺正公亦雅有高志雖爲親屈迹於祿仕常慨然有長往之意季位未滿才德而終公又繼歿於中途志未克就嗚呼豈非命也然公後嗣蕃盛福慶未艾而寺正公則子孫斷絕但有遺墟吁其可悲也已公配黃氏淑哲有婦道生後公二年以戊子歲先卒舉三男四女後配鎮川宋氏處士濟之女舉三男一女男長曰揆義盈奉事次掄出後仲父次措全羅水使次持承旨次振次授進

士女長適司藝李峻次任震成次金一興次任胤元黃海監司次申養側室二女爲武科金汝輝郡守鄭載大妾揆男曰叡女曰李喜掄二男曰寧實女曰洪叙一措繼子曰宥持繼子曰宥三女曰李昌祖進士沈尚鼎李宜術振四男曰宥即後承旨者曰宰寔二女曰李東鎮朴來翼授男曰寵三女幼李峻子女曰聖錫參奉賢錫牧使權懔沈思德卞希純任震成子女曰思遠思運思進金漢章李璿進士李廣道金一興繼子曰漢慶任胤元子女曰進士守迪柳運申養子曰龍甲內外曾玄總九十餘人公歿後三十六



季承旨君狀公事行使振來託墓銘於拯老病昏耗  
已不能為文字事而顧念吾先人與公及寺正公俱  
同歲生自少交好嘗同棲山堂讀書公之往來近邑  
也輒過訪先人情義款至公之喪也先人往視殮又  
為挽以哀之承旨兄弟之見託者亦非以文也謂拯  
之能道公事也不敢辭謹序次而為之銘曰

福難兼備數有屈伸 嗟惟權公有質有文 壽未  
周甲官止墨綬 惟躬之齋乃昌厥後 月川之麓  
林溪谷長 生於是樂歿於是藏 有子克孝劉石  
示久 紀寶無媿媿辭之陋

林川郡守 贈吏曹參判李公墓碣銘

公諱永輝字晦仲 世宗別子廣平大君璵之後曾  
祖諱郁郡守 贈領議政祖諱厚載僉知中樞 贈  
吏曹判書考諱迴掌令 贈左贊成妣 贈貞夫人  
坡平尹氏生員興坡之女公以 天啓甲子二月八  
日生幼有老成器度辛巳丁內艱廬於墓下朝夕哭  
省風雨不廢其別內外尤嚴王母趙夫人滄江公涑  
之姊也賢有士行善之曰兒輩執喪盡禮乙未丁外  
艱疾革割指三季泣血如一日己亥以從祖完南相  
公任除典設別檢吾先人嘗稱滄江公之言以為完



南內舉不失也仕未滿數日而值大政銓郎有欲爲公地者勸報滿當爲之遷屢言終不從辛丑陞內資直長壬寅坐事罷乙巳復冰庫別檢丙午陞義盈直長丁未陞司宰主簿戊申改廣興主簿行視倉庫高其築不使有隙收租之時嚴胥徒出入偷耗爲絕頒祿法皆斛量而倉官舊例皆不量多倍常科公初到吏以舊例不稟而行之公怒責曰身爲倉官私出濫取何異偷竊同僚皆慙臺察亦言此例也不必違衆公曰例雖如此從今永革弊風不亦可乎諸僚從之謬例遂罷冬遷掌隸院司評出補安峽縣監峽邑賦

役無法月令進奉斂於民者甚重縣距使府數百里文移往來其費亦不少民一年出布戶不下數十匹生業日蹙公令民春秋量出布收儲簿其出入凡進奉必預具其物防臨時騰踊急步既有腳價而文書非時急多順付行之一年布有贏餘而民費十減其九按道者葬其妻於管內需求諸邑甚多公曰以上官而私索非義以下官而承奉爲諂然彼以喪請不可拒乃約其物以應之其人怒囑行田都事以災傷罷之一縣驚愕父老攀轅而哭送者出境猶數百人辛亥秋敘復石城縣監當大侵之後一意撫摩爲之



興利除害無所不用民以蘇息六年之間公私完實扶餘人陳姓者與其姪至林川爲其奴所戕姪走免訴于郡郡守洪世亨受賕謂奴有女而陳爭之姪殺叔奴實被枉盡易供辭具案論報獄且成矣會公爲同推至則抑陳姪使不得入公叱吏曰獄當兩造安有不受元告者因問姪備道顛末公命吏取案讀之使聽曰前所供如此而變辭何也姪大驚曰前供與今無變所具者皆非己言公謂洪曰陳姪言改易供辭此非細事公何無一言洪自知情見不敢復出言是日公獨治其獄以奴弑主論請加刑洪聯署不敢

異公憤將發其奸洪走謁按使改公推官易以他人反獄之計則不得售而奴竟斃獄中不得正弑主之罪丙辰秩滿歸戊午除三登縣令西路困於客使公用安峽之政戶收一布分授市人凡餽廩賄幣靡不素具又開邑市通商販定徭限均勞役民力得紓又聚邑子弟讀書武力教射以變陋弱之風在縣四年閱北客且十遭一不見通官人以爲難成川有獄連逮者十數人府使許秩怙勢專恣性又酷不問首從一加以慘刑前後同事者莫敢違異公獨爭以獄太濫且刑杖過重非制秩曰此方人心甚惡小寃何足



恤淹獄有弊不如速殺之公曰此何言也殺之者雖快死者豈不冤乎遂輕其杖疏其最冤者數人將次第論釋會以親病受告秩盡殺之辛酉春病歸癸亥夏叙復敦寧判官拜林川郡守郡素號殷富而吏屬多奸猾公嚴立科條使相司察村里寺店禁不得到郡有二吏稍持廉而以孝聞公召賜酒食曰汝有此特行必盡心職事勿欺官長毋取罪罰以危父母二人感激自誓諸吏亦自奮勵民有以常儀饋吏者不受潛置其家而去吏乃告于眾而還之其風動之效如此戊辰五月秩滿歸京九月十三日以病卒壽六

十五其年十一月葬于廣州光秀山負亥之原從先兆也公爲人惇厚周慎沉凝簡重鄙倍澆薄之言不出於口矯僞修飾之行不見於身居家孝於父母和於兄弟於內外親黨恩義並至或有爭競不平待公爲之解釋誠意懇惻而辭理切當無不感悅其有吉凶輒亦爲之經紀視其有無而適其豐儉事無不辨恬靜自守不喜交遊其在外問遺每遍於寒族而不及權要清白自持前後佩符幾二十季田園第宅不長尺寸其爲治不務新耳目而善因事就功官辭不必新勑而其頽廢者皆繕葺民役不必特蠲而其煩



重者皆補助官無弊事民無雜調古所謂日計不足而歲計有餘者公實似之其所設施事無大小莫不綜錯周備又必使公私兩盡行之無弊而永久不壞故所歷弊皆革而法可守民受潛功陰德而有不自知者性謙退恥名之浮實蘊而不施老於墨綬人或爲公歎惜輒笑應曰家貧祿仕身不親耒耜足矣官之崇卑何足論乎常以喜怒失中毀譽過真爲淡戒曰此皆心有所係而不得其正也尤惡左道小術言今人聽堪輿說欲求善地奪人田廬屢遷丘墓要福於人事之外陷溺之害甚於洪水此數者可以見公

之所存也公歿後十四年以中子濟貴 贈吏曹參判配羅州朴氏 贈貞夫人吏曹參判錦洲君忠肅公烜之女質直溫淳無俗婦人態服御近儉言動依則左右君子敬慎無違處妯娌常自詘而能下公早歲爲農家計甚窘夫人躬親井臼不以爲勞旣屢歷郡邑又力治紡績以資衣服如家居時無所累於官晨興盥洗視事至老而不懈不喜祈禳巫祝之人不入於門晚季內外諸姪或居要地或處大藩而未嘗有所干求皆婦人之所難也與公同年生卒於丙子從葬而異室因地窄耐于右方有三男一女長曰澤



次即濟季浚女適洪受績澤五子一女顯章顯昌顯良顯相顯望相生員婿曰俞晉基濟魁科觀察使二子顯謨顯猷一女未行浚子顯慶女幼顯章二子顯昌子女顯良之子顯相之女並幼拯與公世誼不泛公之宰林石兩邑也屢蒙尋訪見其言貌恂恂久而益知其可親也觀察以其舅氏西溪朴公世堂所撰墓誌來示仍託以顯刻之文衰老凋耗謝去筆研久矣顧以情義之淡不得終辭且以爲西溪之作其於公之表裏已盡之矣其言之可信於後世無疑謹依以爲敘而係以銘銘曰

世道一降士鮮真實  便偏術鬻恥尚俱失  吁嗟  
李公天畀獨厚  外無求慕中有主守  居家六行  
在官三事  愜福平夷不近浮偽  俗人何知君子  
是尊  任真循分以終其身  儲豐享齋必有餘祥  
子顯姓蕃厥類孔彰  有友知公能道公德  于  
以述之用志斯石

處士高公墓碣銘

處士高公諱汝興字賓舉居湖南之興德歲乙巳負笈于吾先子之門日夕講習勤苦不懈吾先子稱其篤實留數月而歸其後歲一至焉至則拯每與之同



明齋遺稿 卷四十一  
處公容貌敦樸資性淳確質勝於文行過於言殆聖人所稱善入者也己酉吾先子之喪公環經來哭爲之暮制後十年卒于家拯爲挽以哀之南川徐景輦亟稱余爲知公也乃者公之子在憐又其弟子友龍奉黃君載重所爲公之狀來請墓銘謹受而讀之言公性至孝終日在父母側未嘗暫休于他所十二丁內艱哀毀如成人先府君再娶趙氏而多子謂公曰汝既有室勢須分異而居公悶泣不敢違居于一里外別墅雞曉冠服趨往拱立于戶外待父母起省問寒燠整疊寢具入廚視甘旨父母飯訖即還家乃食

食己又趨往至夕父母固命之退暫退就庭下知父母就睡然後敢還如是數十年所寒溽暑不廢遠近見聞莫不欽歎壬寅丁外憂葬祭一遵家禮啜粥柴毀而朝夕往墓所號哭三季如一日服闋與諸弟析財公喪母後被養于外王母外王母爲公殖貨買給堤下水田頗良至是公與諸弟趙氏大驚喜過望事趙氏友諸弟出於至誠趙氏感悅慈愛過於所生晨拜祠堂拜己即就廟左松樹下竟夕讀書丙午外王母卒心喪三年以報養育之恩幼時從僧戒默受史書默死公以爲累季受學食素三季其齋日每袖持



明齋遺稿 卷四  
供具躬往助齋識者難之 孝宗大王昇遐亦心喪  
三季鄉人歎服此皆公之實行而拯所未及知者也  
狀又言公甫成童膂力過人人或勸學武事公笑而  
不答自少即有志於學晚生遐鄉絕無師友之助而  
能自奮然興慕聖賢自見吾先子之後益信此學之  
爲可樂專以切己實踐爲務尤嗜讀心經近思錄二  
書務窮其旨而致之於行非如口讀而心不體徒取  
鸚鵡之譏者也平居穆然拱坐言笑有時日用程規  
晚而益嚴甘貧守靜以終其身曾襟冲淡雅好水石  
徜徉吟嘯有迥出塵外之意末季德器凝定動止和

裕所居無賢愚皆敬愛之見其至皆懽然奉迎爭致  
情焉嘗與學子坐槐樹下仰指枝柯而言曰一本萬  
殊理蓋如此其言之有物類此從公遊者亦知口耳  
之可羞實地之可尚此無非公之得於內而形於外  
者也鄉人累以公之刻苦敦篤前後至行薦聞于方  
伯而一命竟不及焉嗚呼此何足加損於公也公之  
先耽羅人八我 朝有諱臣傳事 太宗以功顯即  
公之八代祖也曾祖諱某祖諱某考諱守謙妣金海  
金氏某之女公生於 萬曆丁巳十一月某日卒於  
戊午正月二十三日葬於某縣某鄉先塋側某向之



原配漆原尹氏某之女生六男長在明早歿次在昌  
出爲公之弟某後次在貞次即在懌次在慶季在重  
貞三子長友亮懌三子長友高慶二子長即友龍重  
五子長友參餘皆幼銘曰

嗟哉賓舉古之學者 德義內充嗜慾外寡 守分  
平生無忮無求 嗟哉若人誰將與儔 善必有祥  
天理不忒 我銘其丘後人是勗

尚衣僉正李公墓碣銘

拯季十一始得遇龍仁李公而肩隨之蓋公委禽於  
我叔父石湖府君之門也時府君與吾先君子寓居

錦峽未幾居憂於魯瑩服闋又與市南俞先生築書  
室於錦之麻霞山下而居之公負笈從遊自魯至錦  
首尾四五季公爲人豈弟可敬可親拯雖穉昧猶知  
悅慕公而公亦見愛如弟其後公返京洛我蟄鄉曲  
雖未得相聚如伊時而情義在心到老如一爾來六  
十有餘年矣公配淑人即我同堂長姊也小少親依  
書問眷念老而不置乃於數季之間相繼下世孤露  
後死常抱悲感胤子以余之知公也來屬墓道文字  
顧不忍爲其何敢辭謹按李氏高麗太師吉卷之後  
也公諱舜岳字汝詢號竹牖十一代祖諱士渭從遊



明倫彙編 家範典 卷四十一  
於牧圃諸賢見重一時官開城畱後十代祖諱伯持  
都觀察黜陟使錄清謹高祖諱蓋忠兵曹正郎 贈  
直提學曾祖諱啓仁進士 贈左承旨祖諱士慶大  
司諫考諱後山開城畱守俱 贈吏曹判書妣貞夫  
人豐山金氏判書壽賢之女也公以 天啓乙丑正  
月十一日生幼端粹不喜戲嬉遊錦峽之歲纔勝冠  
矣儀容玉潤詞筆俱妙石湖市南二公俱愛而期之  
其歸洛也先君子以詩送之勉以遠業辛卯庭對高  
選及拆名拘格見拔人咸惜之壬辰薦補齋郎旋遞  
癸巳邁羸疾閉戶靜攝病間始舉癸卯司馬甲辰除

靖陵參奉以事罷辛亥丁內艱宿痾在身哀毀踰制  
癸丑除冰庫別檢乙卯畱守公寢疾公晝夜不解帶  
手奉便旋刺血和藥及遭喪年已始衰而守制愈固  
戊午復冰庫別檢尋換童蒙教官庚申陞義禁府都  
事夏差往濟州同僚有言公非次者公曰當事何論  
夷險換引儀移刑曹佐郎冬除麟蹄縣監邑僻民樸  
公仍俗而治上下相安座側揭公生明廉生威六字  
不事濕束而吏胥不敢恣連值凶歲公以爲使民不  
撓猶勝於區區哺沫凡需於民者一切停止官門如  
水一事不與節省取足以代民役而不以視德且不



以私備穀報上司曰吾盡吾責而已要賞可恥也及瓜而歸也不以一物自隨丁卯拜漢城判官泣訟以公人不得干以私己已除金山郡守民俗喜訟雖至親爭錐刀輒入官庭公以義諭責弊習頗革適有叛奴之獄公以爲倫常之變不可不嚴覈而置之法奴皆饒貲多攀緣監司屢示欲緩之意或有勸止者公執不變竟居下考而歸秋爲宣惠郎辛未除翊衛司翊贊夏復由漢城判官移戶曹正郎惠廳地部俱管錢穀公律已率下一司皆憚壬申移司饗僉正有所不樂棄之甲戌除翊衛司司禦辭遞蓋公嘗謂今之

蔭仕卽古所謂祿仕得失浮沉唯其所遇而年至則休是吾志也又除尚衣僉正不就自是閒居一室以書籍自娛每朝起盥梳整衣冠戶庭之間淨無一塵晚享二子祿養客至輒命酌從容人歸以清福辛巳九月七日考終于京第疾革命侍者具沐湯設新席進新衣以示正終之意在東邑時夢與友人論命告以七十七歲之期覺而語諸子至是果驗是季冬葬于楊州杏村先塋側至乙酉淑人之喪也移兆於同岡未向之原以四月二十日合窆焉公天質恬和雅潔表裏無雜平居正飭自持自少不涉交遊趨競之



明齋遺稿 卷四  
場口無鄙俚浮誇之言抱病以後謂治病莫先於治  
心取性理諸書朝夕玩繹至老不廢其涵養之功多  
有人所不及知者朴久堂長遠嘗以是薦公焉事親  
之節周詳誠篤雖服御微物皆身親看檢親歿後終  
身不服華美祭祀雖寒節必澡浴致潔忌辰則終日  
不改哀容有堂叔八耄窮居公宰邑時以不能逮養  
者移事之誠意曲盡人皆感歎事伯姊如母仲妹及  
仲季兩弟皆先逝撫其遺孤一如己出仲氏晚有一  
子最穉弱取以訓養以至成立使家於宅側軫其飢  
寒季妹嘗邁羸與仲氏親自救護長子死於癘人皆

勸避公曰死生有命而喪事一有未盡則終身之痛  
也遂率諸子親視殮肆惇睦宗族不間親踈開心導  
誨信愛交孚傷外氏之零替祭祀必助兩舅皆以童  
季殉孝公愍其泯沒力言於當路得施旌表之典其  
接物也和與誠慤見有窮隕者周救之不計有無至  
或解所著衣以故平昔從遊皆終始愛慕如親戚焉  
尤謹於交際取予雖素所親厚者若登顯要俊斷還  
往在郡邑饋問不及於權要前後爲官未嘗自求居  
官未嘗爲矯情干名枉己悅人之事教諸子亦一以  
守拙不使之出入論議在東邑時國有慶科有鄰邑



宰過公勸之赴曰吾已與都事約公曰吾固欲赴而君言如是今不可赴也其人謝失言固勸終不赴耽羅之行衝冒潦水主倅見公靴不堪著歸一靴不受畱守公嘗有一僕得之舅氏至公有外族以爲言者立還之有漏僕之尋得者盡歸之宗家有逋僕之子孫來首者以名不載券中拒而不受巫覡浮屠不入於門暮奕雜技不置於前公之平生實行大略如此公少好筆法力追晉軌我仲父童土府君亟賞之晚益精詣人以爲心畫如其人焉淑人坡平尹氏我祖考大司諫入松府君諱煌之孫考卽石湖府君吏曹

參判諱文舉妣平昌李氏諱瑒之女淑人與公同年生而月日後於公自幼端莊靜一動遵女則年十四歸于公事舅姑誠敬而柔婉婦道克備舅姑甚愛重之公居家素不營產且家世清貧淑人劬心經紀服勤夙夜身或冬不緼夕不飧而凡所以奉君子供祭祀待親戚賓客之節無不各盡其道與嫌婦相愛無異天屬得一味輒分會輒勸畱彌旬姊婦李氏每語諸姪曰昔吾輩之未異宮也眷率繁多調度極窘殆不可聊而我妣輒夷然以和顏相對曰事有所謂自然者豈至煩諸人念乎皆歡然相安不知有艱苦之



憂此我之終身敬服而不敢忘者云訓諸子女有法  
常以所嘗習聞於家庭者諄諄焉不輕喜愠罕見於  
言面見人過失輒掩覆之待婢僕亦均施恩意與人  
書辭及言語一無過情之事性本勤儉非有疾病手  
不釋女工老猶不倦若自樂而不知疲者自少不喜  
芬華雖一家宴集遊玩之處絕不往會人有饋遺如  
非其義雖微物亦不受人以急叩則無所靳固從公  
任所嚴內外之防不通商貨市易衙門之內常肅如  
也嘗使一婢遠族謬認爲己物不二言卽出給又有  
一區田亦爲疎族所橫占子弟欲辨之命棄之不與

爭其不屑於財利類如此公卒服闋之後自處猶如  
居喪時子女所進衣服稍似精細則不服後五季乙  
酉二月二十日繼卒壽八十一治命斂衣服勿用文  
繡蓋入松府君家訓婦女不許服段綺出嫁則不與  
焉而淑人謹受家法平居不近華采至是一遵遺志  
不敢有違焉舉三男五女男長世大禮曹進士次世  
會縣令季世最正言女長適縣監金潛次沈漢章次  
察訪朴慶餘次朴弼昌季閔龍見世大一男一女女  
適林挺夏男宜復世會二女一男女適韓鼎朝一未  
笄男宜濟世最二女適崔尚履一幼宜復有一女二



明齋遺稿卷四十一  
男皆幼金潛二子四女曰縣監相勛相履安相英閔  
季基校理李坦閔興洙沈漢章一子四女鳳儀進士  
金聖沆南漢紀李濯朴慶餘二子三女曰命鼎命恆  
李有齡韓德驥朴弼昌三子一女曰師仁師義李道  
弼閔龍見二子二女曰昌衍洪啓英餘皆幼嗚呼我  
同堂兄弟姊妹二十餘人而獨淑人最享壽祿兩美  
合德內外肅雍歲戊寅設重卷之宴膝下曾玄至八  
十餘人吉祥善事世所罕有噫豈無所致而然歟拯  
於胤子之託雖不敢辭而衰病昏耗忘失殆盡把筆  
茫然無所發揮是可媿恨也已謹最而爲銘曰

嗚呼惟公金玉其人 淡乎寡欲一心天真 而守  
其素不求於外 所以行己無處不泰 季至休官  
允蹈其言 位不稱德何足復嘆 溫溫嘉耦式禮  
無違 宜其福履自天申之 我筆非華惟實是徵  
尚有餘慶百世其承

正言李公墓碣銘

嗚呼五福一曰壽而古之祝人者必以壽苟無其壽  
天物則雖有材實何以成其志業也惜哉以吾季瞻  
之賢釋褐僅六年年僅四十四而奄忽於一疾悲夫  
公諱斗岳季瞻其字也姓李氏龍仁人始祖諱吉卷



佐麗祖位太師其後簪組相繼十四世而有諱士渭  
始仕 本朝官開城留後其子伯持事我 世宗錄  
清謹官都觀察黜陟使又六世至諱蓋忠正郎 贈  
直提學即公高祖也曾祖諱啓仁生員 贈承旨祖  
諱士慶大司諫考諱後山留守俱 贈冢宰留守公  
莊重和厚人稱長德君子妣豐山金氏判書諱壽賢  
之女略涉史書婦行甚備公以 崇禎甲申十二月  
十日生幼有氣度稍長文藝早成十七發解居高等  
二十六中進士入泮宮儕友皆推重焉辛亥遭內艱  
乙卯遭外艱侍疾刺股進血居憂致其哀毀守制甚

嚴終喪內外不見面丁巳挈家從外舅晚庵相公於  
扶餘村居四季相公還 朝公亦還京除 孝陵參  
奉壬戌泮製居魁 賜第即差 顯宗實錄修改郎  
廳癸亥分隸槐院其冬差 國葬監造官甲子夏竣  
事例陞典籍移禮曹佐郎又移兵曹兼春秋拜持平  
執法申禁隨事盡言有史官格外傳 諭壞史局舊  
規者有近侍不急父病為宗黨所斥者有蔭官負疵  
誦而拜正職者有冗流附權門而處郎署者皆駁正  
之適以事違牌坐罷冬復拜持平上疏首論恤民困  
賑飢荒之策並及國儲之罄竭請蠲傷財病民之弊



悉講損上益下之政以爲施實惠固邦本之地又請  
依 祖宗朝舊例移奉明善明惠兩公主祠宇於壽  
進宮以其房歲入財穀歸之有司各衙門屯田之無  
益於軍需而利入於私門者錄其穀物一委賑廳以  
補生財活民之道次論擇守令嚴殿最之方并及別  
薦之濫雜請飭諭政官及諸路方伯使之恢公祛私  
無踵前轍舉非其人并罪舉主以示抑僥倖存懲勸  
之意又論朝著之潰裂言路之杜塞用舍之偏係尤  
致眷眷有曰君臣間情志未孚士友中言議相阻無  
望和平之福漸底乖離之域臣僚之不相寅協固有

罪矣亦恐 殿下之處分有所失當而然也近日臺  
閣所論毋論巨細是非輒示厭薄以言獲罪前後相  
續以致一代士類之非罪見斥者不止一二甚非  
聖世之美事也官爵者國家公器惟當付之公議而  
上之與奪下之通塞一任愛惡如是而可望扶士氣  
鎮朝議乎人品賢愚臣節忠邪不在職秩之高下分  
義之踈戚而 殿下顯示好惡於其間不免爲係著  
偏重之歸臣竊惑焉時趙持謙吳道一韓泰東朴泰  
輔諸人鯁直敢言共持清議爲權貴勳戚所忌并見  
黜退故疏語如此又曰茲數臣者文學才華清名直



節皆爲當世之所推許而徒以觸忤巨室之故並被  
聖上之所厭斥何 聖上之厚於彼而薄於此耶疏  
末又以正本源之意責勉 君德申申陳戒 上批  
憂國進言予當體念用舍一款亦當申飭銓曹兩公  
主別立祠宇實是 先朝遺意賑政雖重不可輕改  
也愛惡係著等說雖未知其得當而盡言無隱之誠  
予用嘉尚蓋公之所論勤懇正直故新進一疏 批  
旨特溫入皆嘗觀乙丑拜直講移正言論一時宰不  
法事大忤於時尋遞又坐微事罷職差備局郎公久  
有辭榮養閒之意至是力求外補丙寅春得平康縣

監到任未一月寬仁之政已爲民所頌忽得疾卧閣  
不能視事遂棄歸經歲沉痾竟以丁卯七月十一日  
不起公嘗夢作詩曰人事居然四十春噫其命也歟  
計聞賜賻如儀葬于衿川已省里坐午之原公姿容  
豐碩性度寬裕和易忠實表裏如一平居無甚圭角  
而遇事處義確守己見有不可奪之操其事父母孝  
性出天兒時受父母撻責旋即嬉笑如常不以痛楚  
之色示父母每事必稟雖己所必欲父母不許則不  
敢徑情而行與兩兄友愛篤至孤露之後猶累歲同  
居及異宮亦無日不會事諸姊亦然伯姊久疾日往



明齋遺稿卷四十一  
省視不忍暫離季姊窮窶居恆憂念不能忘仲姊早  
亾撫愛諸甥如己子至於宗戚故舊待之皆加人數  
等其事 君常以不欺無隱爲心雖立朝不久不克  
有所展效而甲子一疏亦可略見其所蘊也素業窮  
空服食居處冷薄難堪而絕無營爲計較之念平生  
口不言貧伯仲兩公嘗相與歎其雖同氣之間未嘗  
有求酒量頗寬嗜而能節人不能強畱守公稱之以  
酒德夙興盥櫛終日對冊常看綱目論語而晚又著  
功於朱書由是發於章疏文字者平鋪質實義理明  
白噫秉筆之任論思之地誰之不如而我自不求入

且沮排長途遠期天亦不假之以年在公雖無加損  
而人之爲世道慨然而爲公屢歎者顧何能己己也  
配淑人全義李氏其考諱尚真右議政諡忠貞卽晚  
庵公也淑人幼而淑惠在室六親莫不稱愛旣嫁事  
舅姑奉君子處娣姒妯娌之間一以誠敬和順無有  
違忤姑夫人之喪方妊滿有病而浴襲諸節強起親  
莅母夫人嘗病劇齋沐祈天願以身代又嘗糞斫指  
略無所難父母舅姑諱日必竭力助需雖老病必強  
赴與祭蓋自養生送死以至追遠務盡其心情文俱  
備公家甚貧窶淑人能經理周悉黽勉有無常使公



忘貧公之病也淑人衣不解帶每日初出虔誠默禱及遭喪自誓下從初不進勺水爲父母子女所持始啜粥而猶不食蔬菜終喪三年之內未嘗露面見人布衫綿衣以終其身既老子女強進細苧之服而終不肯服凡於婚嫁盛會雖至親間一不往祭需必撥貧預儲務致謹潔臨祭輒齋肅躬辨坐以警曉勤於女工至於衰病亦必手有所執業撫愛諸姪睦媼中表待婢僕亦先恩後威尤急人困窮親族家有痼病艱食孀居無依者念念愍恤至或解衣推食而不以爲難其仁心德意隨處藹然在室時晚庵公常恨其

不爲男子教以小學內訓等書又如古昔人物賢邪之可法可戒者常常提說淑人記性過人一一聽受而識有之以此通達古今事理如辭受之節毫髮不苟如其非義視之若浼教子女以義方未嘗姑息及子釋褐特加訓誡使之移孝爲忠毋忝所生其徽範懿行古所稱女士無媿焉淑人與公同季生季十八歸于公後公二十三季終於己丑二月二十四日公初葬於衿川及淑人之喪也改卜兆遷窆于楊州杏洞先塋內未向之原淑人附其左舉一男二女男世德文科說書女長適進士俞命岳次適縣監申采華



世德娶判官尹譚女不育俞出一男拓基一女幼申  
出一男皞余與公世好甚篤伯氏娶余從姊仲氏為  
竹馬友公之胤世德又從余遊情義可知也况其悃  
幅無偽中誠好善實使人有愛慕而不能忘者豈意  
公少余十五歲而乃反先逝使余銘其墓也余衰病  
昏耗筆硯之事已非其任而賢胤以余為知公固以  
為請不得終辭銘曰

吁嗟季瞻命何不淑 厚重宜壽曾不半百 亦既  
蜚英又未展躅 一子無兒善報尤忒 尚有言行  
後人是式 溫溫嘉耦亦克配德 宰如之丘有碣

數尺 故人為銘百世可識

長城府使金公墓碣銘

君諱汝南字汝珍光州金氏也高麗名臣文肅公周  
鼎之後十代祖成雨始居保寧子孫世居之曾祖諱  
應天 贈持平祖諱海壽縣監 贈左承旨考諱榮  
後 昌陵參奉妣全州崔氏監察應夏之女君生於  
崇禎甲戌三月中庚子生員癸卯授北部參奉尋換  
慶基殿參奉歷典牲奉事尚瑞副直長司僕主簿除  
陰城縣監己酉高山縣監辛亥以捕獮賊加通政戊  
午除鎮岑縣監辛酉除五衛將壬戌除僉知中樞甲



子除溫陽郡守甲戌又歷衛將僉知拜長城府使卒於壬午三月十一日配全義李氏吏曹參判行進之女以乙亥十二月生己卯十二月廿五日終君初權窆于家後明年癸未卜保寧縣西金神洞子坐之原遷葬焉李氏祔其後生一男二女男夭女長適李澤次適洪彥度側室二男曰鳳來鳳儀四女婿曰尹健教呂必咸韓配宋尹篤必咸察訪李澤五子曰顯章顯昌顯良顯相顯望相生員鳳來一女鳳儀一男一女尹健教三男一女呂必咸二男皆幼洪與韓早歿無後李顯章二男昌一男一女良一男君資稟豐厚

性度平坦無虛偽雕飾之習居家事親奉祭務效其誠居官奉公舉職思盡其能先參奉公治業致富君承之以施惠濟急為心使人悅賴而無怨惡此蓋君之本末也拯與君戚雖踈而情則親鳳來具碣請銘老病不能為文略最其狀而銘之銘曰  
緋玉之榮素封之有 長者之風耆耄之壽 有子傳重宅相多又 嗟人之生斯福之厚 我書墓石亦可示後

高城郡守金公墓碣銘

公諱盛達字伯兼姓金氏安東人高麗太師諱宣平



其始祖也高祖諱克孝 贈領議政曾祖諱尚容右  
議政殉義於江都號仙源諡文忠祖諱光炫參判考  
諱壽民縣監 贈參判以孝旌閩妣南原尹氏牧使  
諱衡覺之女也公以 崇禎壬午正月二十日生自  
兒時天性仁厚及長休休好善多長者風度一時先  
輩與親戚皆稱許焉甲寅始仕歷孝敬殿參奉司導  
寺奉事桃源道察訪軍資監直長通禮院引儀義禁  
府都事除鎮安縣監其臨民行政一以誠信仁恕涖  
官如治家然一心任眞未嘗計較利害又歷瓦署別  
提漢城府判官出爲高城郡守嶺東連歲大無公竭

心盡誠晝夜不憚民無流亾者以其季八月病歿於  
官百姓奔走號哭以送喪十月葬於楊州先塋下配  
延安李氏正字弘相其考也惠慎幽貞有古烈女模  
範先公六季卒初葬於洪州壬午遷祔公墓之左公  
有五男四女長曰時澤縣監次時潤時濟時洽時淨  
及第李命世宗室密城君棧李恆壽宋堯和其婿也  
側室有一男三女皆幼公家行孝友侍親側愉婉無  
違與兄弟怡怡相悅撫子孫愛而能教待奴僕仁而  
有法廉潔居官坦懷接入家甚貧窮不事產業是以  
常泰然無戚戚之容爲人眞實未嘗矯飾恬淡少物



欲於世上名利尤不以畱心平生不藏喜怒不屑毀譽嘗自謂胷中無宿物儕友莫不以此高之酷好吟詩殆於成癖一時詞伯諸人皆歎服往往閣筆而讓一頭又喜山水與人談奇勝處或忘寢食所居多海山之勝每於佳節與兄弟童冠逍遙其中以自樂在鄉時有鰲山曲在東郡時有蓬萊曲以見意至於超然獨出於世間標榜之外每於衆會時議紛然爭競方起獨引枕假寐而不聽此皆公資稟之脫俗過人者也有詩稿數卷藏于家余與公有戚誼公之子時濟爲從子之婿亦清高有志操今以兄命來請公墓

文以老病辭不獲略爲敘述而係以銘銘曰

嗟君家世如斗如山 嗟君性質如玉如蘭 江湖家計風月襟契 亦有嘉耦琴瑟其友 祿豈必多惜季不遐 有子有孫而孝而才 尚有餘慶可徵方來

靖陵參奉權公墓碣銘

嗚呼周禮六行孝爲之首彝倫之道莫先焉公諱湯字而直姓權氏以孝聞蓋公事親未明而朝左右奉養終日侍坐朝夕在視甘旨夕必親就寢然後退歲設壽席邀宗族連日盡歡親有疾親不進食則亦不



印齋遺稿卷四十一  
食疾甚嘗糞驗吉凶嚙指進血禱天祈命親患疽日  
吮膿血皆古人至行也親喪廬墓啜粥不食菜果油  
醬朝夕哭墓不避雨雪三年如一日去喪之後值諱  
日自月朔素食沐浴致齋婢僕亦令齋潔祭之日朝  
夕粥飲冠服終日或時夢見父母輒涕泣悲慼即傳  
記所載何以加此有從弟貧不能自存與之分衣食  
共甘苦經紀其喪葬其兒長資之成婚眷遇宗黨曲  
有恩意周卹窮乏莫不得歡心此皆孝之推也州人  
累以公之行告于方伯聞于朝廷 命除職以褒之  
歲丙辰除 靖陵參奉不就人勸之謝曰若拜 命

是以孝自處也此尤人所難也平居以清謹儉約自  
守以誠信待人以圖書花竹自娛謝絕人事甘樂閑  
適堂顏揭養素二字此又公他行之可見者也公之  
先安東人文忠公近之後高祖諱愚牧使 贈大司  
憲曾祖諱確 贈戶曹判書祖諱昇同知中樞 贈  
領議政考諱晁嘉善牧使以孝旌閭與公及公之兄  
諒同時上聞諒亦 贈職人謂牧使公不匱之錫公  
昆弟趾美之盛世所罕有也妣全義李氏郡守升亨  
女公以 萬曆壬子十二月廿五日生壬午中司馬  
己巳六月廿一日卒葬于洪州上田鄉羅珠洞癸坐



之原先壠之側從遺命也配恩津宋氏判官希建之女婦道甚備奉養舅姑敬謹祭祀唯公志是順生于壬子十二月二十八日卒于乙丑九月六日葬祔于公之左有三男長博次憤季情進士縣監側室二男曰斗善益善博三男二女曰喬喬曷洪耄姜鳳輝憤無子以曷爲後一女曰李基楚縣監二男二女曰罔后蔡宏胤尹光業者四男長曰任喬三男曷二男罔三男皆幼女子及外出多不盡載拯嘗寓居公之鄉蒙公枉顧甚勤今公季子爲吾邑宰來託公墓碣老病辭不獲謹書實行叙世系生卒子姓而係以銘銘

曰

事親盡誠行可式兮 辭官不居志可則兮 維德之厚享則嗇兮 報善以慶天庶不忒兮

折衝將軍行龍驤衛副護軍林公墓碣銘 癸巳

余曾於先師市南遺稿得見閒好翁海山園林之勝而其早拋簪紱逍遙物外之趣自見於言外殆與退陶所稱聾巖老仙者無異未嘗不追想遐慕於卷中矣中季與梨湖林公直卿相識直卿閒好之孫也爲人清坦任真無修飾外面之意一見已知非俗人其後聞其得官不就以自適於江湖間席名祖之遺



業而享其清福者四十季余由是益高之今其嗣子  
正郎君述事行爲狀憂服遠來托以墓文蓋以余爲  
知公而公亦平日向我特厚故也公諱世溫羅州人  
高麗大將軍庇爲其鼻祖曾大父諱愔觀察使 贈  
右贊成大父諱棟仕至右承旨勇退明時世稱高節  
閒好其號也無子以弟忠翼公諱璋之胤子爲嗣是  
爲公考諱宗儒副率妣淑人達城徐氏忠肅公消孫  
僉知景霧女以 崇禎辛巳五月二十日生公幼而  
岐嶷閑好翁謂其類己手寫梨湖莊園以付之曰是  
必能世吾蹟者閑好翁旣棄世隨嚴君入京年十九

而孤毀瘠成疾自是厭居京華頗欲自放於閒曠特  
以太淑人之命黽勉浮沉於場屋間歲辛亥遭太淑  
人喪遂盡室南歸癸亥偶一赴試中生員是後不復  
入京宰相有知公者薦授桃源道察訪親友咸勸之  
起公喟曰好官固好做耕吾田釣吾水此好事教誰  
做竟不應篤於孝友自親亾一意致愆於祭祀裁割  
烹飪必皆躬蒞至老如一日每有事于家廟必夢謁  
親顏有或不然輒終日不豫教育諸弟妹有父道及  
旣長成各有室家而聞其貧乏輒挈與同居舊時家  
業頗饒有守廩奴私發穀息債積逋已近千斛公鉤



得之謂其漁民悉焚其券而罪守者居濱大江有鹽  
鮑之利終身不爲貨殖居積之事以是清貧日甚而  
處之亦裕如見人窮而有疾病死喪者憫然若己當  
之爲醫藥棺斂以救之嘗欲買第某坊及往胥之不  
稱意欲勿買其主人色若有憾者怪問故蓋數月而  
丁三喪欲售第爲運喪之雇費公聞傻心動謂曰柩  
吾爲君運之君第治葬具遂自捐其坊稷香徒如期  
往運之然其人姓名公竟亦不知也襟懷曠夷而氣  
度更峻嚴人有一善誠心喜之其有不善鑄責不少  
饒鄉人愛而畏之往往有從善而改行者矣平居寢

者

興常於一室暇則披玩古今書史名其室曰欹枕窩  
有取於安樂邵氏之旨云及季七泰正郎君職在從  
臣例推 恩進秩緋玉明季辛卯十月將迎忠翼公  
諡往堂弟南平任所偶感疾十四日卒於寓寢以其  
季十二月葬于靈光郡三貴龍山壬坐之原公配完  
山李氏掌令 贈左贊成迴之女男象德以弟之子  
而爲後即正郎君也女郡守尹扶士人金濟側出男  
象泰象恆象衡象華女金大星丁啓說金會恭李象  
三吳時遜正郎娶直長趙祺壽女時無子郡守之男  
顯教彥教勉教顯彥俱生員女縣令宋堯佐生員任



適士人李蓋一幼象泰三男松壽健源順源象恆一  
男震源象衡三男幼鳴呼公生於世家既已賓國  
庠而登仕籍矣顧雅志在丘壑遺外名利終其身不  
出於梨湖水石之鄉此其中必有所樂而風流韻致  
可謂無忝於前人者矣至其末年見胤子有退步世  
路之意優忻然曰苟若此吾攜汝手汝扶吾杖父子  
倘佯於白雲溪處不亦樂乎此誠古昔賢達士超卓  
塵臼之語也尤令人擊節感歎不能已公嘗病世之  
碑狀類多溢美而曰形像外也先儒猶言一毛髮不  
似便是別人况存乎中而發爲言行者其可以僞加

之乎此亦可見其所存之一端也余老病不能爲文  
字事久矣正郎君之懇至於再三不得終辭謹就其  
狀掇其大者而叙之銘曰

上有前人之貽燕下有後人之揚顯 天之畀公可  
不謂腆 脫灑名利素履自在 故人爲銘亦庶乎  
無媿

四山監役李君墓碣銘 癸巳

李君子貞諱師吉其先咸平人高麗神武衛大將軍  
彥爲鼻祖八我 朝莊襄公從生策勳封咸城君其  
八代祖也曾祖諱璘司憲府監察祖諱應星郡守



贈咸豐君考諱滾府使 贈戶曹判書妣晉州姜氏  
贈兵曹參判晉昭之女也君以 崇禎己卯五月二  
十三日生早孤失學及長贅居尼山仍受學於先君  
子未幾先君子捐世君亦棲遑京鄉憂冗纏綿竟未  
能劬書力學以有成就而於師門追慕篤至以爲沒  
身歸依之地魯岡書院之建也牛谷處士朴公世者  
主其事而君實佐之殫竭誠力以底於成當己巳牛  
栗兩先生文廟輟享之變一路多士抗章辨誣而君  
又爲之首疏雖未徹士氣以張君與我兄弟情義如  
骨肉吾弟子恕性不能容人過每面言君失至於辭

或迫切而君怡然受之少無迂色從遊益親此爲君  
之所長而人不可及者也凡與人交信而有情款明  
村羅顯道以此淡與之庚辰除四山監役西坡吳公  
道一長西銓所舉也越三季癸未考滿當遷而以六  
月十一日病卒葬于尼山酒谷負卯之原君凡三娶  
楊氏閔氏田氏有二女長適金樺次適尹憲一男曰  
森擢武科今爲嘉善慶尙左兵使又有庶子松金樺  
男曰叡魯女婿曰尹溫森二男漢雄次雄松三男君  
歿後十季辛卯以子貴 贈嘉善大夫司憲府大司  
憲三配皆 贈貞夫人森將豎墓碣請余爲文余老



明倫彙編 卷四十一  
病昏塞不能爲而森亦幼從余學固請不已雖數行  
語必欲得余筆以刻不得終辭遂略敘而銘之曰  
學而無成官止一命 有子克孝膺此榮贈 嗟君  
慕善乃其平生 隆師親友終始至誠 八十老夫  
強疾題銘 庶使後世知有子貞

禮曹參判曹公碑銘後記

上之三十有七季己丑七月筵臣趙泰耆白 上曰  
故參判曹漢英庚辰一疏大義凜然虜以爲爲 皇  
朝守節之人與文正公金尚憲一時北去三季燕獄  
終始不撓有雪窖酬唱錄行于世其後又因事有疏

孝廟以士夫氣節當如是稱之 朝家於尊周諸人  
其所褒旌有越常例獨闕於此人誠爲欠典特 命  
贈秩賜諡則實合於崇獎節義之道矣 上曰茲事  
合有褒嘉而未及爲之耶左相徐宗泰曰曹漢英早  
以文章節義望重於時而性伉高不喜交遊以此官  
位淹滯矣 國典官正卿乃贈諡而此則節義表著  
特贈恐無不可 上曰節義如此贈職賜諡可也於  
是 贈資憲大夫吏曹判書諡文忠嗚呼此可以增  
世道之重而慰士林之望矣此一節不載於碑文故  
謹節錄而附其下云



金堤郡守朴公墓銘墓碣銘

於惟久翁德為世範 公為之子實行無忝 居家  
孝友在官廉白 迹近安陽心遠彭澤 世路多巖  
素履獨行 超然塵表慕古作程 雅望自重賢路  
方通 云胡不弔未老告終 不欺之學愛人之志  
冰玉之潔綱錦之美 既蘊于躬又傳之嗣 令  
子克繼資行實粹 乃揚于庭將大厥施 亦短其  
命士林興喟 尚有餘慶來者是承 故人為銘百  
世可徵

星山都君墓碣銘

洪州之上田鄉有善士焉曰都公慶星字君瑞拯嘗  
寓其隣二歲日與之相從見其容貌端良操行修飭  
蓋其天質之美即聖人所謂十室之忠信者也既歿  
其諸子以家狀來曰先人生長鄉曲非淵源之學而  
孝友著於家庭行義達於鄉黨癸亥選士州牧方伯  
皆以先人應薦而竟未霑一命若於沒世之後終使  
湮沒而無傳則豈不為不孝之大罪也願得一言以  
表於墓道余既識公之平生重感諸子之哀誠不得  
以衰病辭按狀公之先星州人上世兩代顯於麗末  
八我 朝亦簪纓數世有諱哲暨佐郎其子諱繼禹



始居於洪寔公之高祖也曾祖諱守慤祖諱顛男考諱榮者妣朔寧崔氏忠武衛鶴之女以崇禎戊辰十月二日生公公自幼性篤孝事親之節一遵小學及長服田力穡以供養嘗曰今人稱以讀書作文追逐度日何時可修人子之職分耶遂廢舉子業又嘗曰今人在親側或不衣冠僂坐放怠見客方始斂容是待親不如客也以此侍親常著上衣及親病月餘不解帶嘗糞甜苦及遭喪自初終至襄葬誠慎無憾連丁內外喪啜粥五年漸毀骨立而終免於滅性實天佑也辛亥癘疫之熾也不忍離几筵而出避為土

室於靈座之側而獨處焉朝夕號哭不輟一村皆痛而竟不染人以此庾袞祭祀一從家禮且革忌墓祭輪行俗規末年家業益落每恨不能稱情得一魚一果不以入口必儲置以補祭需與二弟同居一室飢飽寒暖與之同之有妹寡居無子亦率養之嫁其孤女不失時噫孝友喪祭人之實行夫人苟能於此致誠則學求如此而已然公慕學之志亦切每遇聖賢格言必拈出記錄書諸箴銘貼於四壁中夜誦之余之鄰居也每相就未嘗不見其對冊每對話未嘗及俚俗之談輒以古訓相質此亦可見其所存之實也



韓判官汝翼沈參奉澤之樂善君子也皆與之厚善而常以處士稱公蓋實知其不媿於斯名也癸酉九月二日病卒病時能不亂臨終令婦人出諸子環泣曰死生命也勿爾也以其年十一月葬于其鄉金馬谷與向之原藥泉南相國作挽以送之公娶義城金氏士人天與之女生四男三女男長尚中次允中聖中俱生員季執中婿曰邊匡一李仁增朴燠尚中子曰命德命吉餘內外孫男女皆幼昔董召南竊鄉一寒士也不有昌黎一詩後世孰知安豐縣有所謂董生者也公之質行顧何減於召南而媿余言之無文

不足以傳遠也噫銘曰

民有秉彝孰無是善 外誘既多存者實鮮 嗟哉若人能保其心 終身窮谷不受物侵 貧不可厭 賤非所恥 尚有餘慶可遺後嗣

黃孝子旌門碑銘

仁長萬善孝首百行 世豈其德人孰無性 嗟惟黃公克全厥衷 死者復生誠感皇穹 聖朝褒嘉旌閭授官 瞻聆所洎莫不感嘆 鬱彼雙杏尚在里中 凡有秉彝興慕曷窮 片石紀名千古不朽 矢詩不多維以告後



慶尚左道兵馬節度使柳公墓碣銘

故處士柳貴三道卿甫與余有戚分屢來訪嘗請其先墓表記而去其後與其兄兵使公相繼殞歿兵使公之子萬樞以道卿所撰家狀來見曰叔父撰錄先人事行將躬請碑文不幸暴卒臨亾以其草付不肖使之持納且達遺意余以衰老固辭萬樞去而復來曰叔父祥晷將近若終未蒙許則無以反命於靈筵其言甚切余悲其臨死之託有難終孤且其狀文質實可述遂略加序次而係以銘公諱德三字公達晉州柳氏也始祖挺高麗上將軍世襲簪纓高祖諱洙

成均進士曾祖諱秀薰 贈參判祖諱應星壽爵嘉

善考諱光門 贈參判妣河東鄭氏察訪 贈參判

維之女公以 崇禎壬申十月二十二日生少好讀書文藝夙成而久未成名家貧親老無以為養年二十九始投筆習弓馬公長身美風儀膂力過人以南行宣傳薦試才武藝書講俱第一兵判金公佐明稱之不己遭內艱服闋登乙巳科丁未由宣傳官兼備邊郎己酉陞都摠都事適同僚失言於朝班臺官誤認公劾罷公不自辨俄為摠戎使徐公必遠從事辛亥大饑疫公喪室及二子二女賴徐公厚賻得以治



喪及徐公卒公爲文以祭之見其文者莫不歎賞秋  
拜軍器判官冬除海南縣監寬恕爲政吏民誠服癸  
丑忤上司罷歸乙卯夏拜刑曹佐郎詞訟文簿練達  
無滯冬擢不次超訓練副正旋陞堂上兼司僕將丙  
辰兼內乘丁巳除宣川府使時定齋朴君泰輔適謫  
於其地朴君平生峻潔不與人款洽而獨稱公爲賢  
太守相與酬唱今定齋集多有和公之詩戊午遭外  
艱三年廬墓下與二弟朝夕哭墓辛酉春服闋爲守  
禦別將秋除古阜郡守癸亥大饑公得空名告身販  
穀賑民竟以擅僂白給當罷民間之出米輸官惟恐

或後泮厥數得不罷甲子秩滿歸乙丑終以其時事  
徒配龍仁丙寅赦還己巳由御營別將除濟州牧使  
大臣有斥以驟辭不赴旋由禁衛別將除全羅左水  
使辛未秩滿移慶尙左兵使癸酉入爲堂上宣傳官  
輪臺入侍進啓曰臣待罪湖嶺兩閩時巡點各邑東  
伍軍甚不實凡東伍乃禦敵之最緊者不可不精擇  
充定而稍實壯丁則皆投屬於歇役只是癯殘丐乞  
之類軍伍虛踈莫此爲甚臣意以爲歇役投屬者盡  
汰出充定若營將巡歷時多有不齊之邑隨即啓聞  
論罪則庶有其效矣 上嘉納命採施之以前任水



使時有松島失火徒配忠州冬蒙宥甲戌復爲御營別將乙亥除通津府使以山城修補有效鎮撫使啓聞特陞嘉善公在任數歲連值大無捐俸以活民窮族之來歸者亦皆救濟常令衙眷皆喫粥曰如此凶歲在家則此粥亦難繼是亦過分也邑規之當改者邑弊之當祛者無不至誠爲之民優之戊寅瓜滿以賑事未畢仍任五朔爲廉使所構就理事無實金吾官諉以田結差錯終至徒配翌年宥還自是以後不復有仕進意連爲御營別將守禦中軍會寧府使訓局馬兵別將或行或辭壬午季子萬樞弟子萬增萬

重外孫李聖天俱中司馬入以爲累世積德及公行仁之致公猶以寒門福過爲懼其年五月得病久苦強疾行時祀添劇至六月二十八日遂不起計聞命致賻致祭如禮葬于楊州某鄉向乙之原公天性寬厚待人以誠無表襮畦畛至於當官莅事公正自守每自言吾自仕宦以來大小除拜皆是倘來未有夤緣干請而得者又踈坦不以事物經心飲食衣服任其有無至於箱篋筆硯之具無一箇私藏稱爲自己物而手自封鎖者此其性然也是以累典巨鎮家無餘財兄弟同室朝夕常不繼而處之晏如也一弟



早歿撫養其三子一女婚嫁不失時隣里親舊莫不  
欽歎焉公好讀孟子書及韓杜詩羣居未嘗談諧褻  
語常靜默從容顏貌和平言語真實故人之稱公者  
無論親疎皆曰善人所經閭邑無論軍民皆曰仁將  
仁守蓋公之實德如此公前娶士人李希立女生一  
女一男女李喜鼎進士男萬杓後娶士人羅尚素女  
生一男三女男即萬樞生員女金聲遠李壽泰季幼  
李喜鼎生二男長聖天進士次聖大萬杓生一女李  
重述萬樞生二女金聲遠生一男三女李壽泰生一  
男李聖天生一女一男內外孫曾十八人銘曰

嗟惟柳公迹武心儒 于家于官一心不渝 令弟  
之言人豈間然 求以顯之子孝而文 宰如之丘  
有石如式 我為其銘後人是勗

神道碑銘

副提學慶公神道碑銘

公諱渾字彥晦姓慶氏其先清州人高麗侍中貞烈  
公復興之七世孫也六代祖順節公儀仕 本朝以  
清白著名五代祖習巡衛司大將軍司憲中丞高祖  
諱餘檢校中樞院副使 贈兵曹參判曾祖諱由亨  
朔寧郡守祖諱綿珍山郡守 贈左承旨考諱世清



贈吏曹參判兩代之 贈以公貴也參判公少從佔  
畢齋門人遊學有淵源而與慕齋金先生爲友有隱  
德不仕既歿慕齋記墓表稱其清修行義妣尚州金  
氏郡守良琬之女也公以 弘治戊午七月二十三  
日生氣質異凡德器夙成與仲兄浚受學於慕齋之  
門慕齋愛其才行期以遠大以內從妹之女歸之中  
嘉靖壬午進士登癸巳文科選入翰苑甲午以薦引  
退溪先生見忤於金安老坐罷及陞六品自騎省郎  
歷敷清顯嘗以舍人遞歸驪江居閒處約清貧如寒  
士鄉人至今稱之晚階通政按節湖西累經承旨副

提學以耆老陞嘉善自 上特賜金圈畱爲子孫寶  
爲吏曹參判未及謝爲陳復昌所詆遞爲同知中樞  
府事以 隆慶二季戊辰五月八日卒享年七十有  
一葬于驪州陽和里先塋下未坐丑向之原貞夫人  
陽川許氏濟用監僉正砵之女生於 弘治辛酉十  
二月二十三日性溫靜慈仁事舅姑誠孝備至誨子  
女動遵禮法一家內外莫不敬服焉卒于 八月  
二十日祔葬于公墓之左有三男二女男長時衡縣  
監次時成文科獻納次時英生員女長適通德郎鄭  
希浚次適 贈吏曹參判尹昌世縣監娶僉正成漢



英女生一男四女男邊副司正女婿曰判書李泮兼引儀尹仁賢郡守金起南參奉閔如恕獻納娶典翰朴蘭英女生四男二女男長暹文科參判次選佐郎次遲通政郡守次達縣監女婿曰副司果蘇應嗣監察尹弘輔生員娶佐郎沈鏡女生二男二女男迪遵俱中司馬女婿曰縣監李崙士人具槩通德生四男二女男曰汶沂濂洛女婿曰 贈判書朴孝男進士洪錫胤參判生五男二女男長燧文科府使次煌大司諫 贈領議政諡文正次烱弼善 贈吏曹判書諡忠憲次燾漢城庶尹次燾司議女婿曰士人朴諶

僉正宋熙祚內外曾玄以下幾千餘不能盡載嗚呼公之下世後一百四十有五季歲辛卯公之五代孫生員千會來言於拯曰公歷事 四朝清謹一節爲世所推仰雖有墓碣前面只書同知中樞而無陰記後世誰復知之茲用大懼謹具碑石而屢經兵燹又失家乘言行履歷無復可徵然略述其世系子姓科第官名及家中所傳一二可記者猶賢乎已子亦外裔也蓋爲之文拯瞿然不敢以老病辭顧此後生昧昧無所知識何能有所發揮以垂於後耶然竊惟念慕齋所爲參判公墓文有曰君誨育諸子未嘗不以



忠義節操爲勸又取王昶名子義以命諸子欲其含  
晦自救以畜其德卽此而家庭之訓可見矣及學于  
慕齋之門一遵其規模以行于世蓋外謹言行而內  
有執守主乎忠信而濟以清儉以此立朝三十餘季  
累經朝廷之變故而終無疵累於其身古人所稱見  
用於治朝免禍於亂世者非公之謂歟遂就千會所  
記略加序次而謹爲之銘銘曰  
於惟我祖實德在躬 早服庭訓長事慕翁 立朝  
三紀更歷夷險 素履自如始終無玷 位不滿德  
善積愈厚 內外雲仍蕃衍于後 有孫克孝追樹

顯刻 尚飭釋昧永承遺澤

仲父童土府君神道碑銘

先生姓尹氏諱舜舉字魯直號童土始祖諱莘達坡  
平入佐高麗太祖位太師四世而爲文肅公諱瓘又  
十世而爲昭靖公諱坤始入我朝又四世而爲大  
司成諱倬我中宗己卯間以經學久長成均是生  
諱先智忠清兵馬節度使卽先生高祖也會祖諱暉  
贈左承旨祖諱昌世 贈吏曹參判參判公長子諱  
燧竹山府使仲子諱煌大司諫先生以大諫公仲子  
爲府使公後妣淑人星州李氏其考曰府尹諱玄培



所生妣昌寧成氏牛溪先生諱渾之女也先生以  
萬曆丙申六月丁未生自幼便有高識遠志少學于  
舅氏滄浪先生弱冠德藝蔚然間遊沙溪金先生之  
門丁巳丁府使公憂廬墓三季執制甚固羸毀骨立  
遂爲終身之疾光海末大諫公廢處鄉里先生與從  
弟龍西公棄科讀書以古人相期待 仁祖卽位始  
治公車業先生雅好古文詞不肯屑屑於程式 崇  
禎癸酉始中司馬兩試而竟不得大闡時論稱屈除  
內侍教官爲與宦侍相接也棄之丁丑國家有城下  
之盟大諫公以斥和被譴大諫公弟弼善公殉節於

江都先生與龍西公痛盡家國非常之變卷歸田園  
爲終焉計己卯遭大諫公喪又丁李淑入憂服闋仍  
居墓下乙酉拜大君師傅人謂先生必不降志而先  
生乃入京供職蓋變故以後士多不仕名論競起先  
生有韜光自晦之意其言曰 君命不可不恭赴不  
可傲以爲高也已分不可不量處不可強以爲名也  
辭尊富而處卑貧素其位而尚其事士各有志此或  
一道也寓城南舊第蕭然却掃不與名利相接戊子  
遷尚衣主簿刑曹佐郎出爲安陰縣監秋丁成夫人  
憂制除除宜寧縣監縣有山田收布甚多先生一無



所私盡補民役宜民立石誦清德南秋江孝溫即縣人先生以爲秋江之節可與金悅卿相伯仲不可不表顯也遂建祠妥侑又躬率邑子行飲射養老之禮士俗爲之興起尋棄歸鄉廬復宗簿主簿陞工曹正郎又出金溝縣令先是大諫公之守靈光郡也郡有姜員外沆號睡隱有文章節行先生時纔成童承大諫公命往學焉至是取睡隱遺稿手自編摩捐俸入梓又取其所謂巾車錄者改定名曰看羊以明其志節其後有以是事告于 筵席者睡隱遂蒙 褒贈之恩南中人士莫不感歎庚子又由工曹正郎爲寧

越郡守郡有 魯山上王墓號魯陵墓側舊有一僧舍先生募工重新之自爲志跋及庵記以見微意今上朝追復 端宗位號 命弘文館取進而賜覽焉蓋先生之志至是而得伸也乙巳以司憲府掌令召先生少負重望及齒德俱尊猶低徊郡縣公議以爲鬱歎至是始有是 命先生即赴都適我先君亦除臺職遂謝 恩引公格而遞蓋欲泯其去就之迹不以自異於衆也歷社稷署令翊衛司翊衛陞軍資監正歷禮賓寺尚衣院正以戊申十二月三十日終于城南寓舍壽七十三先生少時常言得聖人之壽



足矣及是無疾而終聞者異之明季三月己酉葬于  
尼山先塋之下辛向之原從治命也以中子搢之貴  
追贈吏曹參判先生天分絕高視世之夸靡饕餮  
者若或澆焉少好學於書無不讀一以繩墨自律中  
季以病稍弛外面工夫然早自得於昭曠之原故於  
榮辱毀譽得失屈伸處之泊如也其居家恩愛篤厚  
由親及疎無不周洽待人接物不以煦煦爲仁悻悻  
爲義嘉其善而矜其不能唯便佞回邪者則斥之不  
少假借淡厭俗流不能與之俯仰平居不以俗事經  
心唯手不釋卷老而不倦講修禮法取范氏義莊呂

氏宗法之規設爲宗約又倣藍田鄉約石潭社倉之  
法以爲洞約尼鄉舊有輔仁堂中廢先生倡率村秀  
羣居修業常喟然有三代之遐思焉其在郡縣清淨  
無爲誠心愛民吏民無不親戴之常曰公事非難了  
唯不擾之以私而已親舊之貧乏者傾俸以周之斟  
酌親疎而輕重其施然必先其無告者爲文章本源  
經傳下洎洛闕諸書而文之以漆園太史辭古而理  
實筆法始學聽松變而爲鍾王一點畫不放過必以  
古法嘗曰此王道也如吳興以下詭遇之流耳草聖  
則取懷素而至其運筆如造化鬼神之不可捉摸者



明齋遺稿 卷四十一  
則蓋其自得也滄江趙公洩每謂先生筆可銘鍾鼎  
文可煥黼黻道可範世俗所著詩文若干卷藏于家  
淑人咸平李氏觀察使春元之女性行淑潔不喜商  
財產爲鄙俗事敬慎烝嘗配德無違丙子避兵也望  
見賊騎卽於懷中揆砒礪吞之一行蒼黃救之良久  
方甦其決烈如此卒於乙未八月八日與先生同原  
而異墳焉後 贈貞夫人三男長曰哲修撰有忠孝  
才誠不幸早卒次曰措魁科大司憲休官辭榮有急  
流勇退之節季曰措美質明秀未娶而歿側室子三  
女一指措措生員婿曰宋光澳修撰一女四男女

適權相夏牧使男長曰道教縣監次德教智教仁教  
大憲三女二男女適李宜遂縣監次李瑩次沈竣生  
員男曰惠教懋教指有男女措有二男措有三男皆  
幼曾孫男女總二十餘人不盡載嗚呼先生與龍西  
公及我先君爲昆弟間知己先君常言吾諸弟之粗  
有樹立本自先生倡之也先生卒未幾我先君與龍  
西公相繼下世先生之玄德至行無人撰述拯與措  
僅就耳目之所逮及者略記一二爲家狀將以求碣  
銘及蒙 贈典措謂拯今則當按式豎碑而世人鮮  
有知先人者兄盍圖之不肖學識淺末不足以堪當



而措意甚固不欲他求未幾遽又逝去嗚呼悲夫今無可辭謹取家狀節略為敘而謹為之銘銘曰

於惟先生古之大人 我不敢知其心孔仁 施之于家孝友睦婣 非由勉強藹然如春 外和中剛 識遠量宏 淑慝真偽莫逃其形 設譽榮辱不入 曾次 含章混塵孰窺涯涘 迹隨祿仕道在吏隱

貞不絕俗義則盡分 優哉游哉安土樂天 君子曰終聖人之年 行廢在命德位未稱 尚有餘慶後人是徵

明齋先生遺稿卷之四十



